


NZAMBI YINA KELE

YA KUFULUKA NA KYADI

 Beno lenda vwanda. Mu vwandaka . . . to ya tulaka munu na kidi-kidi, ntangu mu kotaka mpe monaka Mpangi Moore mpe bawu nionso awa na estrade, bankundi yina mu me zaba bamvula mingi. Ya kieleka ya kele bweso na kumona bawu awa na nkokila yayi. Mu ke tala munu mosi ya fioti na kutelama awa mpe ke tuba na ba théologien ya mutindu yina na manima ya munu, mpe ya lenda vwanda ti ba ke sungika munu ntangu mu kele na foti. Mu banza mutindu yina.

² Beto ke na kiese mingi na nkokila yayi na kuvwanda na muntu mosi awa, Mpangi-kento Rose. Beto vwandaka kulumuka . . . Mu vwandaka na Mpangi ya bakala Shores mpe kisadisi ya yandi, bubu yayi, samu na mwa kudya ya midi. Mpe na nzila kuna, Mpangi Williams me tuba ti Mpangi-kento Rose vwandaka kieleka ya kubela. Mpe beto kwendaka kumona yandi na mwa ntangu fioti, beto fukamaka. Mpe yandi vwandaka na fièvre ya ngolo, mpe yandi vwandaka ya kubela mingi. Kaka mwa bampova ya bisambu, mpe Mfumu zonzaka na beto, mpe tubaka, “Yandi ke beluka.” Yandi tubaka, “Yandi ke vwanda kuna mbasi na nkokila,” bawu ke tuba. Mpe yandi yayi awa na nkokila yayi, ya kuvwanda kaka awa. Ya kele kieleka.

³ Mpangi-kento Rose, beno telama kaka mwa ntangu fioti, na yina ti bawu . . . Beto ke vutula matondo na Mfumu. Yandi vwandaka kuna na mbeto. Yandi tubaka, “Diabulu me kanga munu na mutindu nionso. Mu me kwisa awa mpe mu me kubwa kieleka na yayi,” mutindu mosi ya kimbevo ya laka, mpe nionso yina. Kasi Mfumu me lutisa yandi na yawu, na yawu na yina beto kele na kyese. Na kuvutulaka matondo na Mfumu ya luzolo!

⁴ Ntangu yayi beto vwanda kuzwa bantangu ya mbote. Mpe mbasi na nkokila, ntangu yayi, beto ke kwenda na Ramada. Mpe beno zimbana ve ntangu yayi, ya ke vwanda ve awa mbasi na nkokila, ya ke vwanda na Ramada. Mpe lukutakanu ke banda na nkokila yina ke kwisa. Beno fwana bokila munu diaka na nkokila mosi, beno zaba.

⁵ Na yina mazono na nkokila mu—mu lutisaka ntangu mingi, mu salaka mwa nsilulu samu na munu mosi ti, kilumbu ya ntete ya mvula, ti mu ke zenga kaka Bansangu yayi ya bangunga tatu to yiya, to tanu, mu banza pene ya baminuti makumi tatu to makumi yiya. Mpe mutindu mu tubaka na beno mazono na nkokila, kento ya munu pesaka mulabu na munu Lumingu, yandi tubaka, “Nge me sala kieleka mbote.” Na yawu—na yawu, ya

kieleka, mu vwanda kwisa kaka na nkokila yina me luta mpe mu ke bebisa yawu, beno me mona. Kasi mu vwandaka na baminuti makumi tanu na tanu, na kisika ya ndambu, mazono na nkokila.

⁶ Na nkokila yayi, Billy tubaka, “Yinki nge ke tuba?”

⁷ Mu tubaka, “Mbote, mu kele na mwa banoti ya kusonika awa, mpe mwa Masonuku. Mu zaba ve, bayankaka ya bawu, Bansangu yiya to tanu ya kuswaswana.” Mu tubaka, “Mu ke kuwa ntangu mu ke kuma kuna, mpe mu ke mona yina ke salama.”

⁸ Yandi tubaka, “Nge silaka na kusambila samu na bambevo nionso.”

Mu tubaka, “Yinga, tata. Bakalati yikwa kele na nge?”

Yandi tubaka, “Bankama zole.”

Mu tubaka, “Mu ke sala mbote na kubanda na yawu, na nkokila yayi.”

⁹ Mpe yandi tubaka, “Ntangu yayi bambuka moyo, nge ke baka kaka minuti kumi na tanu samu na kutuba.” Yandi tubaka, “Nge me baka yina me bikana ya yawu mazono na nkokila.” Beto fwana sala nswalu, mutindu yina ve?

¹⁰ Mbote, beto pesaka nsilulu na beno, ti beto ke sambila samu na bantu yina vwandaka na bakalati ya bisambu, mpe beto kele—beto kele ya kutumama na ngolo na nsilulu, ya kieleka. Beto lenda lutisa bawu nionso ve na bandonga yayi, mpe to dyaka ti mu lenda vwanda na kiyeka ya kubokila bawu mosi na mosi, na kati ya bantu. Ata ti Mpeve-Santu ke pesa yawu na munu, mu—mu lenda ve telama ngwi na kusala yawu. Ya kele kaka mingi samu na munu. Mpe, kasi beto nionso me zaba bima yina. Beto me zaba ti Nzambi kele kaka Nzambi. Ya kele ve yina ke belusaka. Ya kele kaka ti kukulisa lukwikilu yina, samu ti beto zaba ti—ti beto kele na Mvwandulu ya Yandi.

¹¹ Mpe beto ke kwenda, na nkokila yayi, samu na kusambila samu na bambevo nionso, mosi na mosi ya bawu yina kele na bakalati ya bisambu, samu ba sambila bawu. Mpe na yina mbasi na nkokila, kuna na Ramada, beto ke meka na kusala yankaka dyaka mpe kubanda kusambila samu na bawu kuna, samu ti mu kele dyaka na mbasi na nkokila. Mpe mu banza ti mu ke na nkokila mosi ya lukutakanu, ntangu yankaka madia ya suka mpe. Ya ke tala mutindu bima ke lutila kuna.

¹² Ya kele na bayankaka, mosi ya bantu yina ke zonzaka ntete ve; ya kele ntete ve, mu banza ve. Mpangi Humburg, to ya kele. . . [Mpangi-bakala mosi me tuba, “Amburgy.”—Mu.] Amburgy, Amburgy, Kash Amburgy. Na yawu mu—mu me zimbana yawu nyonso, ya kele nkumbu yango ya Allemand. Mu—mu banza ti ya kele Allemand. Na yawu mu lendaka yingisa yawu na kintulumukina, mutindu beto ke bokilaka yawu, beno lemvokila nzonzolo, samu na yandi.

¹³ Na yawu beto vwanda kuzwa ntangu mosi ya mbote na Mfumu, ata. Na beno nionso, kana ya kele na banzenza awa na nkokila yayi, ya kieleka beto ke na kiese mingi na kuvwanda na beno awa, mpe beno tula kivuvu ti Mfumu ke sakumuna beno. Mu ke sambila ti ya ke vwanda ve na bantu ya kubela na kati ya kivinga ntangu beto ke kwenda na nkokila yayi, ti Mfumu ya beto ke kulumuka na ngolo ya Yandi ya nene mpe ke belusa bayina nyonso kele ya kubela mpe kele na mpasi.

¹⁴ Awa na mwa ntangu fioti me luta, mu vwandaka yamba bantu yina vwandaka na masolo ya mutindu yankaka, mwa mambu ya mpasi yina beto lenda bakila ve lukanu. Na yina ya me bwelama ya kulutila na nswalu nionso, ti ya fwana vwanda, Mfumu landilaka na kusakumuna yawu, tii beto me kuzwa bankama tatu to yiya vwandaka vingila, mpe na yawu bantu kumaka na mawa samu ti bawu vwandaka vingila. Mu banza, na ntangu yina, beno fwana vingila mbala yankaka na mvula mosi to zole, samu na kukuma na yawu, beno me mona, kaka na kati-kati ya balukutakanu, samu na kuzwa bawu na masolo. Mpe beto ke vwanda kaka mpe ke vingila Mfumu tii kuna Yandi ke tuba kieleka na beto diambu yango.

¹⁵ Ya kele na ntembe ve ti ya kele na bantu ya kuvwanda awa na nkokila yayi yina vwandaka na masolo ya mutindu yankaka. Ya kele kuna? Beto tala beno kutelemisa maboko ya beno. Na masolo ya mutindu yankaka. Yinga, ya kele, na yina, mpe kuzaba ti ya kele kieleka. Beto ke vingila kaka na kumona yinki Mfumu ke tuba, yinki diambu yayi. . . Mpe na yina mu zolaka sukisa yawu awa mwa ntangu fioti me luta. Mu tubaka na Billy ti beto lendaka vwanda diaka ve na masolo ya munu mosi.

¹⁶ Beno me mona, mu—mu—mu me luta bamvula makumi zole na tanu, ntama mingi ve, mbala ya zole, mpe ke kwenda nswalu kuna na mbala ya tatu. Mpe na yawu na yina beno ke kuma mwa mbuta, na yina, beno lenda ve, beno. . . wapi mutindu beno lenda ve kulandila na kusala mutindu beno vwandaka sala. Bitambi ya beno ke kuma nkufi. Mpe—mpe, ya kieleka, Mpangi Moore zaba kima mosi ve samu na yawu dyaka. Yandi. . . Mu banza ti beto kele kisika mosi pene-pene ya nsungi mosi.

¹⁷ Kasi masa mingi me kulumuka na mubu kubanda nge na munu, mpe Mpangi Brown kwisaka awa mbala ya ntete, na Mpangi Outlaw mpe Mpangi Garcia, mpe Mpangi Fuller. Mu ke kukiyufula kana bantu yina ke vwanda awa na nkokila yayi? Mpangi Garcia, Mpangi Fuller, Mpangi Outlaw, bawu kele awa? Beno telemisa maboko ya beno kana beno kele yawu. Yinga, ya kele na Mpangi Fuller, mu ke kwikila, kana mu me sala kifu ve. Mpangi Outlaw awa. Mpangi Garcia, mu—mu ke kwikila ti yandi bikaka Phoenix. Mu banza ti ya kele kieleka. Yandi—yandi bikaka Phoenix, mpe yandi kele kuna na Californie. Mbote, ya kieleka ya vwandaka bilumbu ya nene, mpe mu ke kwikila kaka Nsungi mosi yina mu kuzwaka kuna, “Yesu Klisto kele mutindu

mosi mazono, bubu yayi, mpe kukonda nsuka.” Mu banza ti ya vwandaka pene. . . Mbote, Becky vwandaka bébé. Ya kele pene ya bamvula kumi na yivwa.

¹⁸ Mpe ntangu yayi yandi kele mwana mosi ya kento ya nene, ya kukula, ya kitoko, ya kuvwanda na ngaanda kuna kisika mosi, ya bamvula kumi na yivwa. Wapi kisika nge kele, Becky? Oh, yandi ke kuzwa munu samu na yawu. Mu ke bambuka moyo mu nataka yandi na diboko ya munu. Ya kieleka mu ke ndima ti mu ke kuzwa kisalu mosi na nkokila yayi.

¹⁹ Beno bambuka moyo na yinzo-Nzambi ya Mpangi Garcia na nkokila mosi, yandi vwandaka muntu mosi ya fioti. Mpe mu tubaka, “Beto ke na lukutakanu ya yinza ya muvimba na nkokila yayi.” Mu tubaka, “Mu ke tuba na bantu ya Espagne.” Mpe mu tubaka, “Kento ya munu kele muntu ya Allemagne.” Mu tubaka, “Mu kele Irlandais.” Mpe mu tubaka, “Mpe mwana ya munu ya kento kele Indien,” mpe yina vwandaka Becky.

²⁰ Na yawu ntangu mu basikaka na kielo ya manima, ya vwandaka na mwana-kento mosi ya ntwenya ya Mexique kuna, yandi tubaka, “Mpangi Branham!”

Yandi tubaka, “Yinga, cherie, yinki nge zola?”

Yandi tubaka, “Nge ke banza ve ti bébé ya nge kele na tinta ya kunzuluka, samu na kuvwanda Indien?” Yandi kele ya mbwaki, beno zaba.

Mpe mu tubaka, “Kaka muntu ya Inde na kisalu.”

²¹ Mbote, beto ke vutula matondo, ti, samu na kuvwanda diaka awa na nkokila yayi. Ntangu yayi ntete beto belama na Ndinga, bika ti beto belama na Yandi, samu ti Yandi kele Ndinga. Ntangu Ndinga me monisama, ya kele Yandi na kati ya beno.

²² Mutindu beto vwandaka me sala mazono na nkokila na zulu ya *Nkuna Ya Luswaswanu*, beno me sepela na yawu, Mfumu me sakumuna? Ya kieleka mu—mu me sepela na kulonga Nsangu na beno. Mpe beto ke mona yina kele bankuna.

²³ Ntangu yayi ya kele na ndombilu ya mutindu yankaka na nkokila yayi, kaka kima ya mutindu yankaka? Ntangu yankaka ndambu na kati ya beno nionso yina ke vwanda na ndonga ya bisambu, beno tuba, “Nzambi, tala kyadi. Ntangu mu ke kwiza samu ba sambila munu, ti lukwikilu ya munu kutelama samu na kukuma na misiku.” Mpe—mpe mu banza ti muntu mosi ke na bankundi ya luzolo, ya kubela, mpe kima mosi. Beno zola kaka kutelemisa diboko ya beno samu ti Nzambi kutala kaka na yisi mpe kutuba. . . Ntangu yayi kana ti. . . Beno zaba ve mutindu ya ke sala munu kutala kuna. Beno tala kaka nsatu na kati awa! Bampangi milongi, beno tala kaka yawu. Beno me mona? Ntangu yayi, kana ya ke sala munu kutala mutindu yina, yinki ya ke sala na Tata ya beto? Kieleka.

Ntangu yayi beto sambila.

24 Yesu ya luzolo, beto ke na kubelama ntangu yayi na Kiti ya kimfumu ya nene ya kyadi, na nzila ya Nkumbu yayi nyonso ya kulunga. “Samu ya kele ve na Nkumbu yankaka yina ba me pesa na bantu na nzila ya yina beto fwana kuzwa mpulusu, kasi kaka na Nkumbu yayi ya Mfumu Yesu.” Mpe beto ke na kwiza na Nkumbu ya Yandi. Mpe beto ke sambila, Tata ya Mazulu, ti Nge ke yamba beto, na nkokila yayi, mutindu bana ya Nge yina ke kwikila. Mpe lemvokila kukondwa lukwikilu ya beto, Mfumu. Sadisa yawu na nkokila yayi, ti ya lendaka vwanda ti beto ke kwikila ya muvimba konso Ndinga ya Nzambi na nkokila yayi, samu na bima nionso yina beto kele na yawu nsatu.

25 Nge zaba yina me bumbama na yisi ya maboko yayi yina ba me telemisa; ya kele na kimbevo, bayankaka na kati ya bawu lenda vwanda bampasi ya dibuta, bayankaka na kati ya bawu kele na mambu ya mbongo, bayankaka na kati ya bawu kele ya kulemba, mbala yankaka bayankaka me vutuka na manima, bayankaka kele nsumuki. Nionso yina nsatu kele, Nge kele ya kulutila mbeni nionso. Na yawu beto ke sambila, Mfumu, ti—ti na nkokila yayi, ti beto ke ndima ti bambeni ya beto, mosi na mosi, me nungama, mpe tii na lufwa yawu mosi. Mpe ti beto kele ya kulutila minungi na Yandi Yina—Yina zolaka beto mpe pesaka Yandi mosi samu na beto, me sukula beto na kati ya Menga ya Yandi.

26 Beto ke sambila, Mfumu, ti kukondwa lukwikilu nyonso, ntembe nyonso, kuningana nyonso, nyonso yina kele ya kulunga ve Nzambi, ke kima ntama na beto na nkokila yayi, ti Mpeve-Santu lendaka vwanda na muswa ya nzila na kati ya bantima ya beto. Bika Yandi tuba na beto na mutindu ya mansweki. Bika Yandi tuba na beto na Ngolo ya Yandi. Bika ti Yandi vumbula bayina kele—kele ya kufwa na kimpeve, ke vutula dyaka mavimpi na bayina kele ya kubela mpe kele na mpasi, ke vumbula mabolongo yina kele ya kulemba, maboko ya kulemba yina me kubwa. Mpe ti ya vwanda na ntangu ya kusepela.

27 Ti ya katuka na nkokila yayi, Mfumu, na kubika kisika yayi na Auberge Ramada, mpe kubanda mosi ya balukutakanu ya kulutila nene yina me salamaka ntete ve na mbanza yayi. Mfumu, ntangu beto kele ya kuvukana kintwadi mpe ke sambila! Nge tubaka, “Kana bantu yina me bokilama na Nkumbu na Munu, ke vukana bawu mosi kintwadi mpe ke sambila, na yina mu ke kuwa na Mazulu.” Nzambi, beto ke sambila ti yayi ke vwanda mutindu yina, na nkokila yayi.

28 Ntangu yayi, Tata, na yina beto ke tanga Ndinga, muntu ve lenda tendula Yawu kasi Nge, Nge kele mutendudi ya Nge Mosi, mpe beto ke sambila ti Nge ke tendula na beto bima yina beto ke tanga na nkokila yayi. Samu beto me lomba yawu na Nkumbu ya Yesu. Amen.

²⁹ Ntangu yayi kana mingi ya beno ke zolaka kaka kusonika Masonuku yina mulongi ke tanga. Mpe mu ke zola ti beno sala yawu, na nkokila yayi, kana beno zola, kubaka Ephésiens.

³⁰ Mpe mu vwandaka zonzila Lumingu me luta na zulu ya Ephésiens, mutindu ti Buku ya Josué vwandaka Ephésiens ya Ngwisani ya Ntama, mpe mutindu ya vwandaka Buku ya mpulusu.

³¹ Mpe mpulusu kele na bitini zole ya kuswaswana: “kubasika na” mpe “kukota na.” Ya ntete, beno fwana basika. Bantu yankaka zola kunata yinza na kati na bawu; kasi beno fwana basika na yinza, samu na kukota na Klisto. Beno fwana basika na kukondwa lukwikilu, samu na kukota na lukwikilu. Ya lenda vwanda ve na kima mosi ke kanga beno nzila. Samu na kuzwa kieleka lukwikilu ya kieleka, beno fwana bika kieleka nyonso yina kele ya kuswaswana na Ndinga ya Nzambi, na manima, samu na kukota na lukwikilu.

³² Mpe ya vwandaka Buku ya Ephésiens ya Ngwisani ya Ntama, Josué. Na yina, Moise vwandaka monikisa musiku, yina lendaka vulusa muntu mosi ve; kasi lemvo lenda, mpe awa *Josué* kele mpova mosi mutindu Yesu, “Yehowa-mvulusi.”

³³ Mpe ntangu yayi na yina, beto me mona ti beto me kuma na Ephésiens yankaka, Éphèse yankaka ntangu yayi. Na yina, ti, na ba-denomination ya beto ya lukolo mpe nionso yina, mpe manaka ya beto nionso ya lukolo me kwisa na Jourdain ya yawu—ya yawu, na yina beto fwana vwanda na Ephésiens diaka. Beto fwana vwanda na exode, “kubasika na” mpe na “kukota na,” samu na Enlevement.

³⁴ Ntangu yayi beto ke tanga na nkokila yayi na kapu ya 2 ya Ephésiens. Mu vwandaka tuba kaka yawu samu beno kuma na kisika, to beno baluka na kapu.

Beno, mpe beno me vutula yandi na luzingu, beno yina vwandaka ya kufwa na yimbi mpe disumu:

Na yina na bantangu me luta beno tambulaka landila mutindu ya yinza yayi, landila mwana ya ntinu ya ngolo ya mazulu, mpeve yina ntangu yayi ke salaka na bana ya kutumama ve:

Beto nyonso mpe vwandaka na kati ya bawu na bantangu me luta na kusalaka bisalu ya bampusa ya nsuni, na kulungisaka nsatu ya nsuni mpe mabanza ya beto; mpe beto vwandaka na nkadulu bana ya nganzi, mpe mutindu bayankaka.

Kasi Nzambi, yina kele ya kufulukuka na kyadi, samu na zola ya yandi ya nene na yina yandi zolaka beto,

Ata mpe ntangu beto vwandaka ya kufwa na disumu, Yandi me pesa dyaka beto luzingu kintwadi na Yandi,

to, *me kindisa beto kintwadi na Klisto, (na lemvo beno me vuluka;)*

³⁵ Mu zola kubaka yawu kuna mwa, to kitini ya nzila, “kasi Nzambi,” *Nzambi Yina Kele Ya kufuluka Na Kyadi.*

³⁶ Mu zola ti beno tala awa na profete, ntumwa, na kisika, Paul, nani—nani, wapi mutindu yandi tubaka yawu, wapi mutindu, “Yandi me vutula beno na luzingu, beno yina vwandaka mbala mosi ya kufwa. Yandi me vutula beno na luzingu, beno yina vwandaka mbala mosi ya kufwa, ya kufwa na disumu mpe bayimbi; ke tambula na manima ya bima ya yinza, nsatu ya nsuni, mpe ke lungisa nsatu ya dibanza. Ya . . .”

³⁷ Yinki salaka ti yayi kusoba, beno me mona? Mpe yinki salaka yawu, “na ntangu mosi beto vwandaka ya kufwa,” samu na kuvutuka na luzingu? *Kukindisa* zola kutuba “kuvutula na luzingu.” Ya vwandaka na nsobolo, lufwa na Luzingu. Ya kele ve na kima yankaka, ya kele ve na kima yankaka yina lendaka salama na muntu mosi, ya nene mingi, mutindu ya kusoba yandi katuka lufwa na Luzingu. Bakala mosi, kana yandi vwandaka kufwa, na nzutu, mpe lendaka beluka na nzutu, yina ke vwanda kima ya nene, kasi kima ya nene ve mutindu yandi kele ya kufwa na kimpeve mpe Nzambi me vutula yandi na luzingu.

³⁸ “Nge mbala mosi, na bantangu me luta, ya kufwa.” Nge vwandaka ya kufwa. Mpe mingi awa na nkokila yayi, na ntangu mosi, lenda tala na manima mpe kuzaba ti beno vwandaka ya kufwa. Kasi ntangu yayi samu na yinki beno kele ya kufwa ve na nkokila yayi, mutindu beno vwandaka na ntangu yina? Beno fwana vwanda mutindu yina, samu ti beno vwandaka musumuki, “kasi Nzambi Yina kele ya kufuluka na kyadi.” Ya kele—ya kele kima mosi, “Nzambi Yina vwandaka mvwama.” Bima nyonso yayi yina beto vwandaka, “kasi Nzambi”! Yina salaka nsobolo kaka kuna, “Nzambi Yina kele ya kufuluka na kyadi”!

³⁹ Oh, mu kele na kyese mingi samu na yawu, ti Yandi kele ya kufuluka na kyadi. Kana Yandi vwandaka kaka ya kufuluka na mbongo, kana Yandi vwandaka kaka ya kufuluka na bima, yina Yandi kele, kasi dyaka kima ya kulutila nene kele na kuvwandaka ya kufuluka na kyadi. Oh, wapi ndinga ya nene ya kele, mutindu ti beto vwandaka mbala mosi ya kufwa.

⁴⁰ Mpe beto vwandaka zonzila nkokila yankaka yina na yina mutindu nkuna fwana kufwa. Mpe nyonso pene-pene ya nkuna yango ya luzingu fwana kufwa kaka ve, kasi kupola. Kana yawu bola ve, yawu lenda zinga ve. Mpe *kupola* kele, “kuzimbana ya muvimba; ya me suka.” Mpe tii beto ke kuma na kisika yina mabanza ya beto mosi mpe mabanza ya beto mosi me zimbana ya muvimba mpe ya ke pola na beto, na yina nkuna ya luzingu lenda banda na kuzinga.

41 Ntangu yayi—ntangu yayi beto lenda, mu lenda kotisa kaka mwa malongi awa, ti mu ve. . . Kana nge ke kwikila yawu ve, mbote mingi. Yina keke kaka mbote. Mu ke kwikila yawu. Mu ke kwikila ti—ti muntu, ntangu yandi me butuka na yinza yayi, ti ntangu beno keke bébé ya fioti, yina me butuka na yinza, beno zolaka vwanda awa ve kukondwa kuvwanda luzabu ya Nzambi, samu ti Yandi keke ya seko mpe Yandi zaba bima nyonso. Mpe ntangu mwa bébé yina me butuka na yinza, ya keke na kima mosi na bébé yina. Kana yandi ke vwanda na Luzingu, ya keke na mwa kima mosi na kati kuna, na mwana yina, ti yandi ke kwisa, na nswalu nionso to na manima ya ntangu. Mwa nkuna yina keke na kati ya yandi. Ntangu yayi kana beno baka. . . Masonuku me tuba yawu pwelele.

42 Ntangu yayi kana beno keke na Luzingu ya Kukonda nsuka na nkokila yayi, kana beto keke na Luzingu ya Kukonda nsuka, na yina beto vwandaka ntangu nyonso, samu ti ya keke kaka na mutindu mosi ya Luzingu ya Kukonda nsuka. Beto ntangu nyonso vwandaka. Mpe ya keke samu na yina beto vwandaka, samu ti beto keke kitini ya Nzambi. Mpe Nzambi keke kima kaka yina keke ya Kukonda nsuka.

43 Mpe mutindu Melchisédek kuzwaka bikunku ya kumi na Abraham, mpe ba zengaka yawu na mutekolo ya yandi ya bakala ya nene, Levi, yina vwandaka ntete na kati ya barein ya Abraham; yandi futaka bikunku ya kumi, samu ti yandi vwandaka ntete na kati ya menga ya Abraham ntangu yandi kutanaka na Melchisédek. Mu zola kuzonzila yawu na kisika yankaka, na suka mosi. *Nani Keke Melchisédek Yayi?* Ntangu yayi beno tala yawu. Kuna na manima, Nzambi zabaka mwana-bakala yayi yina vwandaka kulumuka. Yandi zabaka bima nionso.

44 Ntangu yayi beto keke kitini ya Nzambi. Beno vwandaka ntangu nionso mutindu yina. Beno ke bambuka moyo na yawu ve, samu beno vwandaka kaka kinama na Nzambi. Nge vwandaka kaka na dibanza ya Yandi. Nkumbu ya nge ya kieleka, kana yawu vwandaka na Buku ya Luzingu, ba tulaka yawu kuna na ntwala ya mbandukulu ya yinza. Yandi zabaka yina beno vwandaka.

45 Mu ke na kutuba kaka yayi, ve samu na kuvukisa malongi, kasi samu na kusungika yawu, ti beto lenda katuka na boma yayi mpe boma mingi. Beno zaba ve nani beno keke. Beno ke vwanda ve, kasi ntangu yayi beno keke bana ya Nzambi. Beno me mona, beno ntangu nyonso keke bana ya Nzambi. Beno me mona?

46 Samu ti ntangu Nzambi kuzwaka beno na dibanza ya Yandi na mbandukulu, beno fwana vwanda, kitini mosi ya beno, Luzingu ya beno yina keke na kati ya beno ntangu yayi, zolaka vwanda na Nzambi na ntwala kuna. Mbote, ntangu Yandi, na ntwala Yandi kuma nzutu awa na zulu ya ntoto, ntete ya vwanda

na kima mosi, kasi Nzambi, beno vwandaka mosi ya binama ya Yandi. Yandi zabaka yina nkumbu ya beno ke vwanda. Yandi zabaka ntinta ya bansuki beno ke kuzwa. Yandi zabaka nyonso na zulu ya beno. Kima kaka kusalamaka kele ntangu beno, na kuvwandaka musumuki. . .

⁴⁷ Mingi na kati ya beno lenda—lenda vwanda na mbundana na munu na zulu ya dibanza yayi. Ntangu beno vwandaka mwana-bakala ya ntwenia, to mwana-kento ya ntwenia, beno lendaka tambula bisika nionso mpe ya ke vwanda na bima yina ke salama, kisika ya zolaka kwamisa bana yankaka ve, ya monanaka ti ya vwandaka na kima mosi na kati ya beno yina bokaka. Ya vwandaka na Nzambi kisika mosi, kasi beno vwandaka nsumuki. Beno ke bambuka moyo na yawu? Ya kieleka. Ntangu yayi yinki ya vwandaka? Yina vwandaka mutindu ya mwa Luzingu yina na kati ya beno na ntangu yina.

⁴⁸ Mpe kuna na manima ya mwa ntangu fyoti, beno kuwaka Nsangu ya mbote. Ya lendaka vwanda ti beno kwendaka na dibuundu, beno me buka *yayi* mpe *yina*, mpe beno me kwenda denomination na denomination yankaka. Kasi kilumbu mosi, beno na kuvwandaka kitini ya Nzambi, beno zolaka vwanda ndambu ya Ndinga. Mpe ntangu beno kuwaka Ndinga, beno zaba kisika beno katukaka, beno zabaka yinki vwandaka Kieleka. Beno vwandaka ntangu nionso, nkuna vwandaka na kati ya beno ntangu nionso. Ndinga monaka Ndinga yina vwandaka na kati ya beno, yina vwandaka na ntwala ya mbandukulu ya yinza, monaka Ndinga mpe beno kwisaka na Yawu.

⁴⁹ Mutindu mwa disolo ya munu ya ngononi, ya mutindu mwa ngononi yina butukaka na nsusu ya kento. Mpe mwa mwana yango ya bakala vwanda tambula na bansusu, yandi, nsusu ya kento vwanda dila, mpe yandi vwanda bakula ve nkadulu ya yandi ya kukekila. Mpe—mpe mwa bana ya bansusu, madya ya bawu bawu vwandaka na kati ya lupangu, yandi—yandi vwandaka bakula yawu ve, mutindu ti bawu vwandaka sala yawu. Kasi ya vwandaka na kima mosi na kati ya yandi, ya monanaka ti ya vwandaka ya kuswaswana na yina nsusu yina vwandaka, samu ti na mbandukulu yandi vwandaka ngononi. Ya kele kieleka. Kilumbu mosi mama ya yandi kwisaka kuzomba yandi, mpe, ntangu yandi kuwaka kuboka yango ya ngononi, ya vwandaka mutindu yankaka na kukekila ya nsusu ya kento.

⁵⁰ Mpe ya kele mutindu yina na konso mukwikidi yina me butuka mbala zole. Beno lenda kuwa théologie nyonso yina beno zola, mpe luswaswanu nyonso yina muntu me sala; kasi ntangu Ndinga yina ke sema kuna, kuna ya kele na kima ke simba, beno ke kwiza na Yawu. “Beni bayina vwandaka mbala mosi ya kufwa na disumu (luzingu yango) Yandi me kindisa.” Ya fwana vwanda na Luzingu kuna samu na kukindisa, ntete. Nzambi, na nzila ya luzabu ya Yandi ya mantwala, zabaka bima nionso. Mpe ba soolaka beto na ntwala samu na kuvwanda bana-babakala

mpe bana-bakento ya Nzambi. “Beno bayina vwandaka mbala mosi ya kufwa na masumu mpe banzimbani, ya yina beto nyonso vwandaka na bantangu ya beto ya ntama, kasi Yandi me kindisa luzingu.”

⁵¹ Beno tala Paul, ntangu Paul vwandaka muntu ya théologie. Kasi ntangu yandi kwisaka mbunzu na mbunzu na Ndinga yina, Yesu, yawu kindisaka. Yandi kwizaka na Luzingu na nswalu nyonso, samu ti ba tumaka yandi na kuvwanda yawu. Yandi vwandaka kitini ya Ndinga; mpe ntangu Ndinga monaka Ndinga, ya vwandaka nkadulu ya yandi. Ba kukekila nyonso yayi ya bansusu na kati ya mabuundu ya ba-orthodoxe, yandi vwandaka ve na kima na zulu ya yandi; yandi monaka Ndinga. Ya vwandaka kitini ya yandi. Yandi vwandaka ngononi. Yandi vwandaka ve nsusu; yandi vwandaka kaka na kati ya lupangu na bawu. Kasi yandi vwandaka ngononi, na kubanda.

⁵² Mu waka mwa disolo ya mutindu yayi, mu banza ti ya ke wakana kuvweza ve, na yina me tala mwa dibata yina butukaka na nsi ya nsusu ya kento, kilumbu mosi. Yandi lendaka ve kubakula. Mwa muntu mosi ya ngitukulu, muntu ya ngitukulu, mpe yandi lendaka ve kubakula fundu-fundu mpe nyonso. Ba vwandaka sakana na kati ya lupangu. Kasi kilumbu mosi mama ya nsusu twadisaka mwa bana na manima ya yinzo ya kibumbulu, mpe yandi nukutaka nsunga ya maza. Mbote, yandi basikaka na maza yango na ngolo nyonso yandi lendaka kwenda. Samu na yinki? Yandi vwandaka ata fioti ve na kiziba mosi na ntwala. Yandi vwandaka ata fioti ve na masa. Kasi yandi vwandaka dibata, samu na kubanda. Kima kaka yandi zolaka sala vwandaka kukwiza na yandi mosi.

⁵³ Ya kele kima mutindu mosi mukwikidi kele. Ya kele na kima mosi na kati ya yandi, ti, ntangu yandi ke kutana na Nzambi mbunzu na mbunzu, yandi ke kwisa na yandi mosi. Nkuna yina kele na kati ya yandi, mpe ya me kindisama. Oh, ya kele kieleka, mpe yandi ke pumbuka na bima ya yinza. Ba me kuma ya kufwa na yandi. Oh, mu ke bambuka moyo, beto nionso vwandaka na luzingu ya beto, na ntangu me luta, na bima yina ya yinza. Kasi na mbala mosi beto me simba Kima yina ya kieleka, kima yina kindisaka beto, nkuna ya fioti yina kwisaka na Luzingu, kuna bima nyonso ya yinza ke pola kaka kuna. Beto vwandaka dyaka ve na nsatu ya yawu.

⁵⁴ “Yandi yina kele ya kubutama na Nzambi, ke salaka disumu ve. Musambidi na mbala mosi na kukumaka ya kuvedila kele dyaka ve na konsiansi ya disumu, ata nsatu dyaka ya kusumuka.” Kyuvu ya disumu me suka. Beno me kuma kitini ya Nzambi, na kati ya Klisto. Klisto kufwaka samu na kuvulusa beno.

⁵⁵ Ntangu yayi beno banza kaka na nyonso yina beto zolaka vwanda kana ya vwandaka ve samu na Nzambi. Kasi Nzambi, na kyadi ya Yandi ya kifuluka, mutindu Yandi me vulusa beto

na nkokila yayi! Wapi kisika beto zolaka vwanda na nkokila yayi kana ya vwandaka ve samu na kufuluka na kyadi ya Nzambi na zulu ya beto?

⁵⁶ Na mbala mosi yinza vwandaka ya kufuluka na masumu, muntu yina kubeba kukwisa na zulu ya ntoto tii kuna yawu niongisaka ntima ya Nzambi ti Yandi salaka muntu. Yintu ya muvimba vwandaka mputa ya kufuluka na mpasi, nzutu ya muvimba, mpe Nzambi niongaka ti Yandi salaka muntu. Na yawu Yandi tubaka, “Mu ke bebisa muntu yina Mu vangaka.” Yandi ke bebisa bawu samu yandi kele na kima mosi ve kasi kaka nkonga ya kubeba.

⁵⁷ Mpe dikanda ya muvimba ya bantu zolaka vwanda ya kuvwanza na ntangu yina, kasi Nzambi, ya kufuluka na kyadi, ke bika ve muntu yina zaba dyambu ve kufwa na muntu yina zaba dyambu. Mpe Yandi kwendaka mpe kubikaka nzila samu na bayina zolaka kota, bayina zolaka kusala yina vwandaka mbote. Yandi, kubikaka nzila ya kyadi samu na bayina vwandaka na nsatu ya kyadi, mpe Yandi yidikaka nzanza. Na nzonzolo yankaka, Yandi ke tula mwa mapapu na bangononi ya Yandi, ti bawu lendaka pumbuka na zulu ya lufundusu, mpe kudinda ve na masa na bansusu. Kasi Yandi—Yandi salaka nzila ya kukima, na bilumbu ya Noé. Yayi nataka Yandi na kusala yawu, samu na kukubika yawu, samu ti Yandi vwandaka ya kufuluka na kyadi.

⁵⁸ Kasi na manima Yandi me kubika nzila samu na bantu mpe kuna bawu ke manga yawu, ntangu yayi, ya kele samu na yina bawu ke manga yawu kele samu ti ya kele ve na kima mosi na kati kuna samu na kuzwa yawu. Ya kele ve na kima mosi ya kuzwa yawu. Mama ya munu vwandaka tuba, “Beno lenda kuzwa menga ve na kati ya ndunda, samu ya kele na menga ve na kati ya ndunda.” Na yawu kana ya kele ve na mutindu ya Luzingu na kati kuna samu na kuzwa Yawu, kuna ba lenda yamba Yawu ve.

⁵⁹ Ya kele samu na yina ba-Pharisien lendaka kutala kaka na kizizi ya Yesu, mpe kubokila Yandi, “Béelzébul,” samu ti ya vwandaka ve na kima na kati ya bawu samu na kuyamba Yandi. “Kasi nyonso yina Tata me pesa Munu,” Yandi tubaka, “ke kwiza na Munu.” Ya—ya kele na mutindu mosi ya ke vwanda ya kulakisa.

⁶⁰ Beno lenda tuba na bantu mbala mosi na babala-bala, kuzonza na bawu na yina me tala Mfumu, ba ke seka kaka na kizizi ya beno. Mbote, beto fwana sala yawu, na mutindu nionso. Kasi beno kuwa, “Ya kele ve na muntu yina lenda kwiza na Munu kana ti Tata ya Munu kubenda yandi ntete.” Nzambi fwana sala kubenda. Ya fwana vwanda na Luzingu. “Mpe nyonso yina Yandi me pesa Munu, ke kwiza na Munu.”

⁶¹ Yandi salaka nzila samu na bayina zola kuzwa mpulusu. Yandi kubikaka nzila samu na bayina zola kubeluka. Mpe

na yina samu na yina ti Yandi salaka yayi, salaka Yandi ya kufuluka na kyadi, mutindu Yandi ke vwandaka ntangu nyonso ya kufuluka na kyadi. Ya fwana vwanda, kana beno manga Yayi, ya kele ve na kima me bikana kasi Lufundusu, samu ti disumu fwana kufundisa.

⁶² Pharaon, ntangu yandi kotaka na mubu, mutindu mumekudi, na kumonaka ti yandi lendaka kota mutindu Moïse kusalaka. Moïse na makesa ya yandi, mpe Pharaon na makesa ya yandi, bawu zole lendaka kufwa na mubu, ya monanaka mutindu yayi. Kasi Nzambi, ya kufuluka na kyadi, salaka nzila ya kukimina samu na bana ya Hébreux, (samu na yinki?) samu ti bawu vwandaka landa na nzila ya kusalu, bawu vwandaka landa na kati ya Ndinga.

⁶³ Ntangu yayi ya kele kaka mutindu ya kuzwa kyadi, ya kele kulanda malongi yina Nzambi me pesa beto samu na kulanda. Ya kele kaka mutindu yina Yandi lenda lakisa kyadi, ya kele ntangu beto ke landa yina Yandi tubaka na kusala.

⁶⁴ Mutindu mwa masolo ntama mingi ve, na longi yina tubaka ti mu vwandaka longa Malongi ya bantumwa na kilumbu yayi. Mu banza ti mu zonzilaka na yawu na nkokila mosi to zole me luta, to kilumbu mosi, na yina mutindu yandi tubaka, “Nge ke na kumeka na kukotisa, na nsungi yayi, Malongi ya bantumwa.” Yandi tubaka, “Nsungi ya bantumwa sukaka, na bantumwa.”

Mpe mu yufuluka yandi, “Mbote, nge ke kwikila Ndinga?”

Yandi tubaka, “Yinga.”

⁶⁵ Mu tubaka, “Apocalypse 22:18 me tuba, ti, ‘Muntu nyonso yina ke katula Ndinga mosi na Yayi, to ke bwela ndinga mosi na Yawu,’ bampova zole kaka ve; Ndinga mosi, katula Ndinga mosi.”

Yandi tubaka, “Mu ke kwikila yawu.”

⁶⁶ Mu tubaka, “Na yina mu lenda tuba na beno kisika nsungi ya bantumwa kupesamaka, Balusakumunu ya bantumwa kupesamaka na Dibundu; ntangu yayi beno tuba na munu kisika Nzambi katulaka yawu na Dibundu, na nzila ya Ndinga. Beno lenda ve kusala yawu; ya kele kuna ve.” Mu tubaka, “Ntangu yayi beno bambuka moyo, ti Pierre, na Kilumbu ya Pentecote, yandi vwandaka kukotisa ya nsungi ya bantumwa. Mpe yandi tubaka na bawu nyonso na, ‘Kubalula ntima, mpe beno botama na Nkumbu ya Yesu Klisto samu na lemvo ya masumu, mpe beno ke kuzwa dikabu ya Mpeve-Santu. Samu nsilulu kele samu na beno, mpe samu na bana ya beno, mpe bayina nionso ke ntama, ya mingi Mfumu Nzambi ya beto ke bokila.”

⁶⁷ Ntangu yayi kana beno zola kuwa kukekila ya nsusu mosi ya denomination, mpe ke zinga kuna na bima ya yinza, na yina ya ke talisa ti ya kele na kima mosi ke tambula mbote ve. Samu ti,

Yina kele Ndinga. “Muntu nyonso yina zola, lenda kwiza.” Mpe kana beno kele na luzolo, beno fwana kwiza. Kasi kana beno ke na luzolo ve, na yina beno kele na nkadulu ya mawa. Kasi kana beno ke na luzolo ya kukwisa, beno kwisa landa mukanda ya Nzambi!

⁶⁸ Mpe Yandi ke kondwaka ata fioti ve na kulungisa yina Yandi silaka. Mu vwandaka mbala mosi ntwenya, mpe ntangu yayi mu me kukula, mu me monaka Yandi ntete ve kubwa na kati ya Ndinga ya Yandi. Samu ti, Yandi lenda sala nyonso kasi kubwa. Yandi lenda kubwa ve. Nzambi lenda ve. Ya lenda salama ve samu na Nzambi na kubwa, mpe kuvwanda Nzambi. Yandi fwana, kusala yawu.

⁶⁹ Ntangu yayi makesa ya Pharaon mekaka na kumekula, samu ba bokilaka bawu ve mpe bawu vwandaka na Luzingu yina ve. Na . . . Ba pesaka nsilulu na Pharaon ve. Ba pesaka yandi nsilulu ve samu na yinsi ya nsilulu.

⁷⁰ Mpe mumekudi mosi, ke na kumeka na kulanda mukwikidi ya kieleka yina ba me bokila na kima ya mutindu yina, ke na kuseka kaka yawu. Yawu yina diambu na systeme ya beto ya misambidi ya bubu yayi, bantu mingi ke meka na kumekula Mpeve-Santu, bantu mingi ke meka na kumekula mbotika, bantu mingi ke meka na kumekula nsungi ya bantumwa. Ya kele samu na bakwikidi, mpe yawu kaka. Nzambi me sala nzila, ya kufuluka na kyadi, ti bana ya Yandi ke kufwa ve. Yandi me sala nzila samu na bawu.

⁷¹ Ntangu yayi, Pharaon vwandaka meka na kulanda, yandi dindaka na kati ya masa yina vulusaka Moise mpe kimvuka ya yandi. Ntangu yayi, Moise dindaka ve na masa, samu Nzambi kele ya kufuluka na kyadi samu na bayina ke landa nzila ya Yandi kubikaka. Amen.

⁷² Beno lenda mona yina mu zola kutuba? Ti, na nkokila yayi, bantu yina ke kwikilaka ve na kubeluka ya Kinzambi, bantu yina ke kwikilaka ve na mbotika ya Mpeve-Santu, wapi mutindu bawu lenda kuzwa kima mosi? Nzambi kele ya kufuluka na kyadi na bayina ke landa na manima ya Yandi; ve na manima ya credo, kasi na manima ya Nzambi.

⁷³ Nzambi kele Ndinga, mpe Yawu kumaka nsuni mpe zingaka na kati-kati ya beto, ntangu yayi, samu ti Yandi monisa binama yankaka ya Nzambi. Nzutu, Yesu, vwandaka nzutu ya Nzambi, kinama. Moise monaka Yandi ke luta, kitini ya Yandi; muntu mosi ve monaka kizizi ya Yandi. Kasi ntangu yayi beto me mona Yandi, beto me tala Yandi, beto me mona Yandi mutindu Munkayulu. Ntangu yayi, beno me mona, Yandi vwandaka kinama ya Nzambi, na kuvwandaka ya kumonisama, Ndinga. Yawu yina Yandi vwandaka.

⁷⁴ Mpe ntangu mukwikidi nionso ke kwisaka na Nzambi, yandi ke kuma kinama ya kinama ya Nzambi ya Ndinga ya Yandi,

yandi me sadila Ndinga yina ba silaka samu na kilumbu yina. Beno me mona? Ya kieleka. Nzambi, ya kifuluka na kyadi, me bika beto ata mbala mosi ve kukondwa kimbangi. Yandi kele ya kifuluka na kyadi.

⁷⁵ Beto ke tala ntangu yayi ti Nzambi vwandaka na kyadi mingi na Moïse kuna na mubu yango ya kufwa, kuna na Mubu ya Mbwaki kuna, mu zolaka tuba. Na yina ntangu Yandi tubaka awa, na Exode 19:4, Yandi tubaka, “Mu me nata beno ntama na mapapu ya bangononi, me nata beno na Munu mosi. Ke nata yawu na mapapu ya bangononi, mpe ke nata beno na Munu mosi!” Ya vwandaka na bantu yankaka na kati-kati ya mubu yina kuna, mpe, yina vwandaka meka na kumekula. Kasi yinki? “Yandi nataka bawu na mapapu ya bangononi.”

⁷⁶ Ntangu yayi Nzambi ke fwanikisa ntangu nyonso bapofete ya Yandi na bangononi. Mpe yinki ya vwandaka? Moïse vwandaka munati-nsangu ya Yandi. Mpe bawu vwandaka landa Moïse, mpe yina vwandaka mapapu ya bangononi yina bawu vwandaka landila, samu ti yandi vwandaka nata nsangu ya Nzambi. Mpe bantu landaka yawu. Bawu vwandaka landa Nzambi na yina bawu vwandaka landa Moïse na nsangu ya Yandi ya luvukulu. Mpe Biblia ke tuba ti, “Yandi, bawu kufwaka ve na bayina kwikilaka ve.” Na yina ti, Nzambi vwandaka ya kifuluka na kyadi ya bawu, samu ti bawu vwandaka landa misiku ya Yandi. Nzambi zola ti beto landa misiku ya Yandi.

⁷⁷ Beto lenda tuba mutindu mosi samu na Koré mpe samu na Dathan mpe bantu ya bawu ya kukondwa lukwikilu, mutindu bawu mekaka na kumekula. Bawu mekaka na kumekula kima mosi na manaka ya Nzambi. Ba zolaka ve manaka ya muntu mosi. Ba zolaka yawu ve. Ba zolaka vwanza na kima ya kusala. Koré tubaka, “Kasi, ya kele na bantu mingi ya santu kulutila nge, Moïse. Nge ke na kusalaka mutindu ti ya vwandaka kaka ntoto na zulu . . . to mutindu ti nge vwandaka kaka nge mosi na zulu ya ntoto, mu zola tuba.” Mpe yandi tubaka, “Mu—mu . . . nge lenda sala yawu ve. Mpe ya kele na bantu mingi awa.”

⁷⁸ Mpe Moïse zabaka ti yandi zolaka nata bana yina kuna na yinsi ya nsilulu, samu ti nsilulu pesamaka na yandi. Mpe yandi zolaka nata bawu na yinsi ya nsilulu.

⁷⁹ Mpe, bubu yayi, Mpeve-Santu kele awa samu na kusiamisa Ndinga ya Nzambi, mpe ya kele ngononi yina beto fwana tambula na zulu ya yawu; ya kele ve théologie yina muntu me sala. Kasi beto ke tambula na zulu ya mapapu ya ngononi, na Yinsi ya nsilulu.

⁸⁰ Mpe awa bawu zolaka kuzwa nkonga ya bansusu na ngaanda kuna, Koré banzaka, beno zaba, samu na kwiza, kumekula yayi, ngononi. Mpe ntangu bawu salaka yawu, Nzambi tubaka, “Kabwana nge mosi na bawu,” mpe Yandi me mina yinza. Yandi zolaka mina kima ya muvimba, kivangu ya muvimba,

kasi Nzambi vwandaka ya kufuluka na kyadi na bayina ke na kumeka na kulanda Ndinga ya Yandi. Ntangu nyonso, Nzambi ya kufuluka na kyadi. Mingi kati ya bawu kwisaka na lweka na Moise, mpe Nzambi zibulaka ntoto mpe minaka muntu ya kukondwa lukwikilu. Yandi, muntu ya kukondwa lukwikilu, ke kufwa ntangu nyonso.

⁸¹ Bayina kwikilaka ve, ata ti bawu basikaka mpe tambulaka mwa ntangu fyoti, kasi, bawu, Yesu tubaka, “Bawu kele, mosi na mosi, ya kufwa.” Ya *kufwa* kele “kubwa.” Bawu kele ya kufwa. Beno banza kaka na bawu. Bawu basikaka, monaka bimangu ya Nzambi, na kumonaka diboko ya nene ya Nzambi, yina vwandaka yangalala na mani; mpe kwendaka kuna mpe kuwaka muntu ya nkumbu Balaam, yina me bebisa mutindu ya Nzambi, na nzila ya malongi ya yandi ya kuswaswana na Ndinga, “Beto nionso kele bampangi, na yina beto vukana.”

⁸² Ya kele sysiteme yankaka ya Balaam yina ke na kumata, bubu yayi, “Ti beto nyonso vukana.” Ya ke simba ve. Beto tambula na Ngononi, Yehowa Ngononi. Beno kele bangononi.

⁸³ Ya kele kaka na tatu yina me vuuka na nkonga ya muvimba; Moise, Caleb, mpe Josué. Bayankaka ya bawu kufwaka na ntoto ya kuyuma; Yesu tubaka yawu, na Santu Jean kapu ya 6. Nzambi, na kyadi, ke bika bawu kufwa ve, samu ti, na bantu yankaka ya kukondwa lukwikilu. Bawu nyonso kufwaka kaka kuna na ntoto ya kuyuma, mpe bawu kele ya kufwa. Nzambi vulusaka Moise na bakwikidi ya ngononi, samu ti bawu vwandaka na buzitu na Ndinga ya Yandi.

⁸⁴ Mpe bubu yayi, nkundi, mutindu kaka ti beto lenda kuzwa lemvo na Nzambi; Nzambi kele ya kufuluka na kyadi, bubu yayi, kasi beto fwana zitisa yina Yandi tubaka samu na yawu. Beno lenda kaka ve kubaka yina muntu yankaka me tuba. Beno fwana baka yina Nzambi me tuba. Yandi tubaka, “Bika ti konso ndinga ya muntu kuvwanda luvunu, mpe ya Munu ya kieleka.”

⁸⁵ Bubu yayi ba me tuba na beto ti, “Nionso yina beno fwana sala,” na bisika mingi, “kele kukota na dibuundu, kuvwanda na credo, to kima mutindu yina; to kutuba kisambu, to beno tula nkumbu ya beno na buku, to beno kulosa mwa maza to kubotama na mutindu mosi, to kima mutindu yina. Yawu yina kaka beno fwana sala.” Kasi yawu yina luvunu.

⁸⁶ Samu na kuvwanda ngononi ya Nzambi, beno fwana landa Ndinga, kilumbu na manima ya kilumbu. Beno fwana landila, na kudya na Ndinga.

⁸⁷ Ntangu yayi beto ke tala bawu, na manima ya ntangu yayi, ke na kuniunguta dyaka, ke na kulemba na lukwikilu, na manima Nzambi lakisaka bawu kyadi. Mpe beto ke mona bawu ke niunguta na Nzambi, mpe, ntangu bawu salaka yawu, bawu vwanda kufwa na meno ya ba-nyoka. Mbote, bawu me fwana na yawu. Ya kieleka bawu kuzwaka. Muntu nyonso yina ke sala

foti Ndinga ya Nzambi mpe ke sala bima yayi yina bawu salaka, bawu fwana kufwa. Mosi na mosi ya bawu zola, zolaka kufwa na ntoto ya kuyuma.

⁸⁸ Kasi ntangu bawu vwandaka ya kubela mingi ti ata mpe dokotolo Moise mpe ata mosi ve na kati ya bawu lendaka sala kima samu na yawu, mpe bawu vwanda kufwa na mafunda; kasi Nzambi, ya kufuluka na kyadi, Yandi salaka nzila ya kukimina samu na bayina ke kwikila Yandi. Yandi salaka nkisi samu na yawu, na kuvwandaka nyoka ya kisengo. Nzambi na kati ya kufuluka ya Yandi . . . Nzambi kubikaka nzila ya kukimina samu bana ya Yandi ya kukwikila lendaka beluka.

⁸⁹ Nzambi ke sepelaka na bima nionso yina kele mbote ve, nionso yina beno ke na yawu nsatu. Konso kutambula ya luzingu, Nzambi ke sepela na beno. Beno kele mwana ya Yandi, mpe Yandi kele ya kufuluka na kyadi. Yandi zola kusala samu na beno.

⁹⁰ Bantu sumukaka na ntwala, na kubakaka kima mosi yina Nzambi salaka kukatula-masumu samu na bawu, na nzila ya nyoka ya kisengo, yina vwandaka talisa disumu yina ba me fundisa ntete, mpe ba kumisaka kiteki dikabu yina. Mpe bawu sumukaka dyaka. “Nzambi ke kabula ve nkembo ya Yandi na muntu mosi.” Na yawu, beto lenda vwanda na zole ve, tatu, banzambi yiya. Ya kele kaka na Nzambi mosi. Yandi ke kabula ve nkembo ya Yandi na kima yankaka. Yandi kele Nzambi, kaka, beno me mona; na yawu mutindu mimpani kele na banzambi mingi. Beto kele na Nzambi mosi, mpe Yandi ke kabula nkembo ya Yandi ve na yankaka, to Yandi ke bika ve kima nionso kuvwanda kiteki na ntwala ya Yandi. Ata ti Yandi me katula masumu samu na bantu, mpe ya vwandaka Ndinga ya Nzambi, ya vwandaka kieleka; kasi ntangu bawu kumisaka yawu kiteki, na yina bawu kotaka na mpasi.

⁹¹ Ntangu yayi ya kele kaka kima mutindu mosi, mu banza, ya salamaka na bansungi ya beto ya dibuundu. Nzambi fidisaka beto nsangu ya Martin Luther na nsangu ya yandi, John Wesley, nsangu ya pentecote, kasi yinki beto salaka na yawu? Kima kaka mosi yina bawu salaka na nyoka ya kisengo yina, beto me zonzila yawu, “Mu kele ya *yayi*, mpe mu kele ya *yina*.” Beno me mona, beno kele na kima mosi kukondwa kieleka yina kele ya kuvukana na kisambu ya busantu ya kieleka ya Ndinga.

⁹² Yinki salamaka? Biblia, ba me tuba na beto na kati ya Biblia, ti, “Profete bakaka kiteki yina mpe bebisaka yawu.” Alleluia!

⁹³ Yina beto kele na yawu nsatu bubu yayi kele profete yina ke bebisa kiteki ya ba-denomination, yina ke banza ti bawu ke kwenda na Mazulu na zulu ya kuvwanda ya credo mosi to denomination mosi; kele na nsatu ya kubeba mpe kunyengisa, kulosamaka. Nzambi kele ya kufuluka na kyadi. Yandi kele ya kufuluka na kyadi. Na kilumbu yina ntangu beto nyonso zolaka

vwanda na kati ya poto-poto ya mpimpa yina kuna, kasi Nzambi, ya kufuluka na kyadi, me fidisa beto Mpeve-Santu ya kieleka ya kisina, na ntendulu ya Yandi Mosi na Yawu, kaka awa na kati ya yinzo konso nkokila. Nzambi, ya kufuluka na kyadi ya Yandi, mutindu beto ke tala Yandi kuvwanda mbote! Yinga, tata.

⁹⁴ Ntangu yayi nyonso bawu banzaka ti bawu zolaka sala vwandaka kukwenda kaka na nyoka yayi, to kima yayi ya fioti yina Nzambi salaka kuna, salaka ti Moïse kusala mpe kanga yawu kuna na zulu, mpe bawu lendaka beluka kukondwa kuvwanda na kieleka nionso. Bawu telemaka kaka mpe talaka yawu. Mpe bawu bandaka na kutuba yawu, mpe Nzambi fidisaka profete kuna mpe bebisaka yawu.

⁹⁵ Ntangu yayi, bayina nionso mangaka na kutala nyoka yina na ntoto ya kuyuma, bawu kufwaka. Ntangu yayi Nzambi ke salaka nzila, kasi kana beno manga na kutala yawu, kana beno ke vwanda na lweka ya bala-bala, kana beno kangama na credo mosi mpe beno manga na kutala mbala mosi na kati ya Ndinga mpe kumona kana Yawu kele kieleka to ve; bayina nyonso mangaka na kutala, bawu kufwaka. Mpe Nzambi kele Nzambi yina ke sobaka ve. Mpe bayina nionso mangaka na kutala, kufwaka. Ya kele mutindu mosi bubu yayi, kima mutindu mosi.

⁹⁶ Na yina bantu vwandaka sumuka na ntuala, mpe mutindu bawu ke salaka yawu ntangu nyonso, mpe vwandaka sala kiteki na—na yawu, na kusalaka yawu . . . kuzwa, na kumekaka na kuzwa kubeluka kukondwa bukieleka, mpe bawu “vwandaka ya kima mosi,” mpe mutindu beto ke salaka bubu yayi. Mpe ntangu yayi beto ke mona kuna, luswaswanu ya yawu, vwandaka, ti Nzambi . . .

⁹⁷ Ya vwandaka kukatula-masumu ya mbote mpe kidimbu ya mbote samu na ntangu yina. Na ntangu yina, ya vwandaka mbote mingi. Kasi ya vwandaka kaka samu na ntangu yina, samu na nzietolo. Yawu yina kaka ya ke sala, nzietolo *yina*.

⁹⁸ Mpe nsangu yina Martin Luther nataka, ya kunungisama, vwandaka mbote mingi samu na nsungi ya Luther. Yandi kwendaka kaka kuna kasi ntama mingi ve.

⁹⁹ Kusantisama vwandaka mbote na nsungi ya Wesley. Yawu yina kaka.

¹⁰⁰ Na manima beto me kota na nsungi ya pentecote. Mpe kuvutula ya makabu kele kima ya mbote mingi, ya vwandaka mbote na nsungi, kasi beto ke kwenda ntama na yawu ntangu yayi. Beto kele na zulu ya yawu, kaka kieleka mutindu ya kele na yinza. Beto fwana kuma na zulu ya kima yayi, samu ti beto me sala kima mutindu mosi na yawu yina bawu salaka ntete, kusala kiteki na yawu. “Mu kele na ndonga *yayi* ya yawu, mu kele na ndonga *yina* ya yawu.”

¹⁰¹ Nzambi ke fidisa muntu yina ke katula kima mosi mpe ke pasula yawu na bitini-bitini, mpe ke siamisa Ndinga ya Yandi,

Ndinga ya muvimba. Beno tala. Lukumu na Nzambi! Ntangu yayi beto ke mona ti ya kele kieleka. Nzambi, ya kufuluka na kyadi ya Yandi!

¹⁰² Na yina ntangu profete bebisaka yayi, ya bikaka bawu kukondwa kidimbu ya kubeluka ya nzutu, ya kukatula-masumu, samu kiteki ya bawu bebaka. Kasi Nzambi, ya kufuluka na kyadi, salaka bawu yankaka. Mpe yinki Yandi salaka, yina? Yandi vwandaka ningisa maza na ndonga ya maza na tempelo, mpe mingi kwizaka mpe kubelukaka, na kukotaka na maza yayi. Yesu kulumukaka na kiziba yayi, mpe monaka bakala yina vwandaka ya kulala kuna kubanda bamvula mingi, na kuvingilaka kuningana ya maza. Beno me mona Nzambi, ya kufuluka na kyadi! Ata ti bawu me zonza kima yina, ata ti profete zolaka pasula yawu, Nzambi salaka nzila yankaka samu na bawu, samu ti Yandi kele ya kufuluka na kyadi. Yandi zola ti bawu beluka, mpe Yandi salaka nzila samu na kubeluka ya bawu.

¹⁰³ Ntangu yayi, na yina ya landilaka, yinza kumaka mingi ya masumu mpe mingi ya masumu, ntangu nyonso. Mpe na nsuka yinza kumaka mingi ya masumu ti Nzambi zolaka bebisa yawu, Yandi tubaka na Malachie 4, “kana ti mu kwiza mpe kusemba ntoto na nsingulu.” Yandi zolaka sala yawu; kaka kyuvu.

¹⁰⁴ Kasi na yina Nzambi, ya kufuluka na kyadi, Yandi fidisaka Mvulusi, Yesu Klisto. Yandi fidisaka Yesu na kuvwanda Mvulusi mpe munganga. Samu ti Yandi tubaka, “Mutindu Moise zangulaka nyoka ya kisengo na ntoto ya kuyuma, mutindu mosi ba ke zangula Mwana ya muntu,” samu na lukanu mosi. Yandi, kukatula-masumu, ya kele yina beto ke na yawu nsatu, kima yankaka ve kasi kukatula-masumu. Yina Yesu sumbaka na Menga ya Yandi, ya kele yina beto ke lomba. Mpe Biblia ke tuba, “Yandi lwalaka samu na masumu ya beto, Yandi lwalaka samu na masumu ya beto ya nkú, kitumbu ya ngemba ya beto kubwaka na zulu ya Yandi; mpe na bamputa ya yandi beto belukaka.” Ya kele samu na yina beto lenda lomba, samu ti ya kele samu na yina kukatula-masumu, ti beto ke telama, ya kutuma beto. Nzambi, ya kufuluka na kyadi!

¹⁰⁵ Yayi zolaka vwanda kukatula-masumu ya Kukonda nsuka, samu ti Yandi kwizaka Yandi mosi. Nzambi kwizaka Yandi mosi, na mutindu ya nsuni ya masumu, samu na kusala kukatula-masumu ya Kukonda nsuka; mpe talaka mpasi na nzutu, mpe salaka kukatula-masumu; mpe vutukaka na mutindu ya Mpeve-Santu, samu na kusiamisa kukatula-masumu yina. Kisika nyoka ya kisengo to ata maza ya mpasi zolaka sala yawu, yawu nyonso lakisaka na Kukatula-masumu ya kulunga yina. Nzambi, ya kufuluka na kyadi ya Yandi, me sala yayi.

¹⁰⁶ Ntangu yayi, bubu yayi, na kuvwandaka ya kele kilumbu yina beto ke na kuzinga, beto me luta na bansungi ya dibuundu

yayi mpe tendulaka bima nionso samu na kukatula Yawu. Ba-théologien ya beto ya kilumbu yayi me zimbisa kumona lweka yina ya Yawu. Ba ke tendula Yawu nyonso, na kilumbu mosi yankaka, na mwa nsungi yankaka, na manima, kubanda ntama. Mpe kubeluka ya Kinzambi vwandaka kaka pene-pene ya kubasika, na mpasi ba monaka muntu yina ke kwikila yawu. Ba vwandaka seka yawu. Kulutila ve na kutala bamvula makumi zole me luta, ba vwanda seka yawu. Ba-Pentecotiste vwandaka na kutala ntama na yawu. Bawu bandaka na bilumbu ya ntete, kasi bawu kwendaka ntama na yawu.

¹⁰⁷ Beno tala mutindu bawu salaka. Ntangu yayi bawu kele na mutindu ya denomination, yina ke basika samu na kusala bawu konso credo, mpe nionso yina. Kana, na kisika ya kundima Nsemo, mutindu Nsemo kotaka; bawu kubongisaka mpe salaka bawu mosi ba-credo, mosi na mosi ke kwisa pene-pene, na kusalaka malongi mpe na kuvwandaka na malongi yina. Mpe na yina ba kwendaka mingi ntama tii Mpeve-Santu lendaka ve kukota na dibuundu. Bawu me kuma kaka kiteki yankaka mutindu nyoka ya kisengo, yawu me kuma kusambila biteki. Muntu nionso tubaka, “Mu kele na *yayi*, mpe mu kele na *yina*.” Ya vwandaka kusambila biteki. Wapi mvindu beto vwandaka, na ntangu ya nsuka.

¹⁰⁸ Kasi Nzambi, ya kufuluka na kyadi ya Yandi, me vutula Mpeve-Santu na zulu ya beto, mpe ke siamisa Ndinga ya Yandi na nkokila yayi mutindu Yandi silaka ti Yandi ke sala. Nzambi silaka ti Yandi ke sala bima yayi. Beno tala yina Yandi salaka!

¹⁰⁹ Beno tala yina Yandi salaka, ntangu yayi beto lenda mona mutindu Yandi silaka konso nsungi kima yina ke salama. Mpe beto ke mona ti ya salamaka kaka kieleka mutindu yawu, ti Yandi tubaka ti Yandi ke sala, samu ti Yandi kele ya kufuluka na kyadi ya Yandi, samu na ntangu nyonso kuzwa kyadi samu na kulungisa konso Ndinga yina Yandi silaka. Yandi fwana sala yawu, mpe ntangu nyonso, samu na kuvwanda Nzambi. Ntangu nyonso Yandi ke salaka yayi, Ndinga ya Yandi ke salamaka ntangu nyonso na nsungi ya Yawu. Nkuna ya Yandi yina Yandi me kuna na ntoto. Yinki Yandi salaka? Yandi tulaka yawu awa na kati ya Ndinga, mpe yina kele nkuna. Mpe konso ntangu nsungi ke landila, nkuna yina ke yela, mpe ntangu yina kusungika ke basika. Mpe Yandi silaka yawu, mpe ya ke salaka yawu.

¹¹⁰ Ntangu yayi beto me lunga ve na bima yayi. Beto me lunga ve na balusakumunu yayi ya Nzambi, samu ti beto basikaka na manima ya bima ya yinza, kotaka na foti ya Caïn. Caïn, kutungaka autel ya mbote mpe dibuundu ya mbote, mpe tulaka bafololo na zulu ya yawu, mpe banzaka ti ya kele kieleka yina ya vwandaka, “Ya vwandaka nkonga ya ba-pomme to ba-poire, to ba-grenade, to nyonso yina ya vwandaka,” ti tata mpe mama ya yandi kudiaka na disamba ya Eden, yina basisaka bawu.

Mpe na yawu yandi vutulaka yawu na Nzambi, mpe Nzambi mangaka yawu.

¹¹¹ “Kasi Abel na lukwikilu pesaka na Nzambi munkayulu ya kitoko mingi kulutila Cain.”

¹¹² Mpe, bubu yayi, Biblia ke tuba na Jude, ti, “Bawu kotaka na nzila ya Cain; bawu zimbanaka na kudasuka ya Koré.” Beno me mona, “bawu kotaka na nzila ya Cain,” na kutungaka ba-autel, na kutungaka mabuundu, ba-denomination, na kusalaka yawu kitoko mingi, ya nene, ya bamambele ya kulutila bayankaka; ba ke kotisa bima nionso, nionso yina ke kwisa kuna mpe yina me sote, to me pesa mbote, to me baka mbotika na mutindu mosi, to zonzaka na bandinga, to kimaka na yisi, bawu tulaka nkumbu ya bawu na buku. Ya kele kieleka. Mpe na manima beno baluka na Kieleka yina ba longaka, mpe beno manga Yawu. Wapi mutindu ya lendaka vwanda mutindu yina? Beno tala mvindu beto vwandaka na yawu! Beno tala.

¹¹³ Mpe Biblia ke tuba, “Mpe bawu kwendaka na nzila ya Balaam, mpe kufwaka na kudasuka na Koré.” Bawu kufwaka na kudasuka! Yinki vwandaka kudasuka ya Koré? “Mbote, beno ke banza ti beno kele muntu kaka ya santu? Samu na yinki, ya Nzambi. . .Beto nyonso kele ya santu. Dibuundu ya muvimba kele ya kulunga. Beto nionso. . .Beto nionso kuvukana, yawu yina beto fwana kusala.” Ya kele kisika bawu kufwaka, yawu. Mpe ya kieleka beto fwana kuma na yawu. Beto fwana vwanda na yawu.

¹¹⁴ Kasi Nzambi, ya kufuluka na kyadi, me basisa beto na poto-poto yina mpe ti beto mona yawu ntete kima kusalama awa. Ya kufuluka na kyadi ya Yandi, mpe me fidisa beto reveil ya kubeluka ya Kinzambi, mpe nkwezulu dyaka ya Ngolo ya Nzambi. Landila disolo, ata reveil mosi ve me salama na zulu ya bamvula tatu. Réveil yayi nataka bamvula kumi na tanu, ya vwandaka milaka yina vwandaka pela, na ziunga mpe bisika nyonso na yinza. Samu na yinki, samu beto me fwana na yawu? Nzambi, ya kufuluka na kyadi ya Yandi, ve samu ti beto zola yawu to samu ti beto me fwana na yawu, mu zolaka tuba. Beno banza kaka na yina yawu me sala!

¹¹⁵ Mu ke banza na mosi ya bampangi ya beno ya bakento kaka awa na Phoenix, ti mingi ya beno zaba, Mama Hattie Waldrop, yandi vwandaka na cancer ya ntima. Mpe yandi vwandaka na ndonga ya bisambu awa ntangu Mpangi Moore mpe munu vwandaka awa mbala ya ntete, pene ya bamvula kumi na tanu, kumi na nana me luta. Mpe yandi vwanda kufwa, na cancer ya ntima, mpe yandi zolaka kufwa kubanda ntama. Kasi Nzambi, ya kufuluka na kyadi, me fidisa Ngolo ya Yandi na zulu ya yandi. Mpe Yandi me vulusa luzingu ya yandi, mpe yandi ke na kuzinga bubu yayi. Nzambi ya kufuluka na kyadi!

116 Senateur Upshaw, muntu ya nene. Mu banza ti yandi vwandaka ntwadisi ya yinsi, to kima mosi, ya—ya ba-Baptiste, na Lukutakanu ya ba-Baptiste ya Sud, na ntangu mosi, to ntwadisi ya yinsi to kima yankaka. Yandi salaka nionso. Yandi vwandaka muntu ya mbote. Yandi salaka nyonso yina yandi zabaka mutindu ya kusala. Yandi kwendaka na konso dokotolo. Muntu ve lenda sala kima samu na yandi. Ba kangaka yandi nzila. Milongi sambilaka samu na yandi. Yandi vwandaka na mafuta ya ba-litre yiya ba tiamunaka na zulu ya yintu ya yandi, kupakulama, ya balongi ya mutindu na mutindu bisika nionso.

117 Na nkokila mosi, na Los Angeles, na Californie, mu kwendaka na chaire, mu talaka ya vwandaka na kinkuku ya bakiti ya bambevo pene ya bambala zole, bambala tatu, na yina kele ya kuvwanda awa, kuna na kati ya bakulwale, tii na manima. Mpe na yina ya vwandaka kuna na mbeto mosi ya bambevo na mwana-kento mosi ya ndombe na kati ya yawu, mwana-kento ya Ndombe, mpe mama ya yandi—ya yandi vwandaka ya kuvwanda pene-pene ya yandi. Mpe mpangi ya munu ya bakala vwandaka nata ndonga ya bisambu.

118 Mpe mu vwandaka tala, na kuzabaka ve yina vwandaka salama. Mpe mu monaka dokotolo mosi, na bamaneti ya monture ya makalu, yandi vwandaka sala na mwana-kento mosi ya ndombe, samu na mpasi ya laka, mpe yandi kumaka kikata. Mpe mu talaka na nziunga, mu banzaka, “Wapi mwana kele?” Mu lendaka ve kumona yandi.

119 Na manima ya mwa ntangu fioti, kuna, ata kivuvu mosi ve, mwana-kento ya luzolo pene ya bamvula sambwadi to nana, samu na kuvwanda kikata luzingu ya yandi nyonso. Mpe ya vwandaka na mama ya yandi kuna ya kufukama, vwandaka sambila. Na yina mu tubaka, “Dokotolo yayi me sala lipaso ya mwa mwana ya nge ya kento,” mpe me lakisa.

Yandi tubaka, “Ya kieleka, tata.”

120 Na yina yandi mekaka na kunata bébé na estrade. Ba tubaka na yandi na kusala yawu ve. Ba mekaka na kulembika yandi. Kaka na ntangu bawu kumaka swi, mu banzaka, “Mbote, beto ke kuzwa siansi ya kusambila samu na yandi.” Na mwa minuti fioti. . . Ntangu yankaka bantu awa vwandaka kuna na nkokila yina.

121 Mpe mu vwandaka tala na nkonga ya bantu, mu monaka mwana-kento yina ya fioti vwandaka kulumuka, ya vwanda talana mutindu na nzila ya mwa nzila ya fyoti, na popi na maboko ya yandi, vwanda benda popi yina. Ata mutindu dokotolo tubaka ti yandi ke ningana ve na luzingu ya yandi ya muvimba; Nzambi, ya kufuluka na kyadi, me fidisa Mpeve-Santu, na nzila ya vision, mpe mwa mwana ya kento yina telamaka kuna, mpe yandi na mama ya yandi simbaka maboko mpe kwendaka na kulwale yina, samu na kukumisa Nzambi.

¹²² Kuna na manima vwandaka bakala mosi ya kiboba, Senateur Upshaw, mingi na kati ya beno me zaba kimbangi ya yandi. Yandi vwandaka muntu ya mbote, yina mekaka luzingu ya yandi nyonso, ya bamvula makumi sambanu na sambanu yina ba salaka na kiti ya bambevo, yina ba tulaka na mbeto; yandi vwandaka na ba-béquille na maboko ya yandi, ti yandi vwandaka tambula, yandi vwandaka tambula diaka ve na mavimpi ya mbote. Mpe yandi vwandaka kuna, ke tala yawu. Mpe na mbala mosi, mu talaka kuna mpe mu monaka vision mosi. Yandi yayi me kwisa, yandi vwandaka tambula na zulu ya nkonga ya bantu, na yintu ya kukulumusa, yandi vwandaka tambula kaka mutindu muntu nionso. Mu zabaka ve nani bakala yango vwandaka.

¹²³ Mu tubaka, “Ya kele na muntu ya nene ya kuvwanda na manima kuna. Yandi kubwaka na chariot mosi ntangu yandi vwandaka mwana-bakala ya ntwenia, na zulu ya dibaya ya matiti, mpe yandi talisaka mpasi na mukongo ya yandi. Ba tobolaka mabulu na kati ya ntoto, samu na kukebama na kuningana ya ntoto, ntangu bantu vwandaka tambula, ya ke bula na mukongo ya yandi.” Mu tubaka, “Yandi me kuma muntu ya nene, mpe yandi ke na kulandila na kukula kulutila nene. Yandi kele ya kuvwanda na selekele ya nene na Yinzo ya Mpembe.”

¹²⁴ Mpe kuna muntu yayi kwizaka mpe tubaka na munu, yandi tubaka, “Ya kele Senateur Upshaw. Nge me kuwaka ntete kuzonzila na zulu ya yandi?”

Mu tubaka, “Mu me kuwaka ata fioti ve na yandi.”

¹²⁵ Mpe na yina yandi tindaka mwa micro baladeur kuna mpe bawu vwandaka solula, mosi na yankaka.

¹²⁶ Na yina mu bandaka na kutala na nziunga, mpe mu monaka Muntu ya Congrès ya ntama ke kwiza, yandi vwandaka tambula na munu, na vision, yandi vwandaka kaka ya kulunga mpe ya kulunga mutindu yandi lendaka vwanda. Nzambi, ya kufuluka na kyadi, katulaka yandi na kiti ya bambevo yina, mpe yandi tambulaka kukondwa ba-béquille tii kilumbu yandi kufwaka. Nzambi ya kufuluka na kyadi! Ntangu badokotolo kubwaka, ntangu science kubwaka, ntangu bima nionso yankaka kubwaka, Nzambi vwandaka ya kufuluka na kyadi samu na Senateur Upshaw.

¹²⁷ Mu ke banza na munu mosi. Mutindu mwana mosi ya bakala ya kukula, mu ke bambuka moyo mutindu. . . Bantu ke bokilaka munu bubu yayi, “muntu yina ke yinaka bakento.” Ya kele samu na yina ya vwandaka, ya kele samu ti mu me mona bakento mingi ya kukondwa luzitu ntangu mu vwandaka mwana ya fyoti. Mu vwanda yinaka bawu. Mpe mu ke salaka yawu ve ntangu yayi, samu ti mu zaba ti ya kele na bayankaka ya mbote. Kasi mu ke bambuka moyo mutindu ya vwandaka yimbi mingi,

na kukondwa mingi luzitu. Mpe mu banzaka, “Oh, mu—mu ke vwanda ata fioti ve pene-pene ya bantu. Mu me longukaka ve, na yawu mu ke kuzwa muntu mosi ve.”

¹²⁸ Mpe mwana mosi ya fioti ya kuvwanda kuna, kukondwa simisi na mukongo, na kazaka ya munu ya kukanga na zulu mutindu *yayi*, na epengele ya lukengolo, mpe mwini vwandaka ngolo mingi. Mpe mulongisi tubaka, “William, nge kele ve na tiya na kazaka yina?”

¹²⁹ Mu tubaka, “Ve, mama, mu ke na kuwa mwa fyoti madidi.” Mpe yandi salaka munu kukwenda kuna na kikalangu mpe tulaka mwa yinti na kati ya kikalangu, mpe mu zolaka zika na tiya. Mpe mu—mu vwandaka ve na kinkuti na nsungi yayi nyonso.

¹³⁰ Mpe mu banzaka, “Kana mu lenda kuzwa mbongo, na mwa ntangu mosi ti mu lendaka kusumba mwa, mu kusumba mwa carabine makumi tatu-makumi tatu,” Mu vwandaka basika na Wesete awa mpe vwandaka zinga awa mpe kuzomba, samu na luzingu ya munu nyonso. Mu zolaka ve kusala kima mosi na bantu. Beno vwanda kaka ntama, samu ti bawu zolaka munu ve, mpe—mpe mu ke vwanda kaka ntama ya bawu.

¹³¹ Mpe na yawu konso ntangu mu kwendaka na ville, samu na kutuba na muntu mosi, kutala bantu mosi na bala-bala, mu zabaka. Mu ke tuba, “Mbote kuna, Jean, Jim! Wapi faso?”

“Oh, mbote.”

¹³² Beno me mona, bawu zolaka ve kuzonza na munu, bawu zolaka ve kima ya kusala na munu, samu na papa ya munu mpe bayankaka yina salaka whisky. Mpe mu—mu salaka yawu ve. Ya vwandaka kima mosi ve mu salaka. Mpe mu zolaka vwanda na kifwani yina.

¹³³ Kasi ntangu yayi mu tubaka na kento ya munu, ntama mingi ve me luta, “Kibaka ya munu kele ya kukangama na minduki ya kulutula mbote yina ba lendaka sumba.” Oh, mpe mu ke banza na bilele yango ya ntama ya mvindu. Na nkokila yayi mu kele na zole to tatu ya mbote ya bakazaka. Mpe ata bankundi? Mu fwana bumbama na ntoto ya kuyuma, samu na kuvwanda ntama ya bantu. Wapi dyambu, ya kele samu na bumuntu ya munu, ya kele samu na ndongosolo ya munu? Ve. Nzambi, ya kufuluka na kyadi, monaka munu na mutindu yina mpe Yandi vulusaka munu.

¹³⁴ Mu ke bambuka moyo ti ba twadisaka munu na maboko, mutindu muntu ya mpofo. Mu lendaka mona ve. Nyonso na ntwala ya munu vwandaka nsende; mu lendaka vwanda ya kufwa meso luzingu ya munu nyonso. Kasi Nzambi, ya kufuluka na kyadi, me vutuka na ntwala ya munu. Mu kele na bamvula makumi tanu na tanu, mpe kele dyaka na meso ya mbote. Nzambi, ya kufuluka na kyadi, kele kima kaka yina mu lenda tuba.

135 Mbala mosi dibuundu kubikaka ve kubeluka ya nzutu. Bawu vwandaka na mosi, kasi bawu kumangaka yawu. Kasi Nzambi, ya kifuluka na kyadi, me fidisa bawu dikabu ya kubeluka ya Kinzambi. Ya kele Mpeve-Santu na kati-kati ya beto, na kusiamisaka Ndinga na bidimbu yina vwandaka landa. Nzambi ya kifuluka na kyadi!

136 Mu kele na ba-page zole to tatu awa ya banoti yayi, kasi mu ke meka ve na kusimba yawu, samu ti mu kele—mu zaba ti ya kele na kutala ntangu na kubanda ndonga ya bisambu yina. Kasi Nzambi ya kifuluka na kyadi ya Yandi!

137 Mingi na kati ya beno awa na nkokila yayi, badokotolo mangaka beno. Ya kele na bantu yina kele ya kuvwanda na bakiti ya bambevo yina, kukondwa ntembe bawu ke basika kuna ve. Bawu ke bikana kaka kuna. Bayankaka ya bawu, bikata na mitindu yankaka, bawu (zolaka ata mbala mosi ve) fwana kutelama ve kuna, ya kele ve na mutindu samu na bawu na kutelama kuna. Kasi Nzambi, ya kifuluka na kyadi ya Yandi, me kubika kukatula-masumu. Benomanga yawu ve. Benokuzwa yawu. Ya kele na bantu kuna na mpasi ya ntima, ya kele na bantu na ba-cancer, yina badokotolo lenda sala kima mosi ve. Benokele ya kukondwa kivuvu, ya kukondwa lusalusu, na yinza yayi.

138 Kasi Nzambi, ya kifuluka na kyadi ya Yandi, me fidisa Mpeve-Santu, mpe kele kaka awa ntangu yayi samu na kusiamisa Ndinga, samu na kusiamisa ti Yandi kele mutindu mosi mazono, bubu yayi, mpe kukonda nsuka. Samu ti beto me fwana yawu? Samu ti Nzambi kele ya kifuluka na kyadi ya Yandi! Amen. Ntangu yayi ya kele Yina, ya kele Muntu, Ya kele Mfumu Yesu yango. Yandi kele ya kufwa ve, kasi Yandi me vumbuka na lufwa, mpe Yandi kele moyo ntangu nyonso.

139 Yandi kele mutindu mosi mazono, bubu yayi, mpe kukonda nsuka, dyaka kaka ya kifuluka na kyadi ya Yandi mutindu Yandi vwandaka na kento yina vwandaka basika menga. Mpe yandi bandaka na kati ya nkonga ya bantu. Ya vwandaka ve na kivuvu samu na yandi, badokotolo salaka nionso ba lendaka sala. Yandi vwandaka basika menga. Yandi vwanda kufwa. Mpe yandi simbaka lele ya Mfumu. Nzambi, ya kifuluka na kyadi, me baluka mpe me tuba na yandi mutindu ya yandi. Mpe yandi belukaka na kubasika ya menga yayi.

140 Mwa ndumba, ya yimbi me kwenda na dibulu ya maza kilumbu mosi, samu na kuzwa mwa maza. Ata kivuvu ve. Ba basisaka yandi na bamwense, na ziunga ya bantu, luzingu ya yandi vwandaka ata mbote ve. Mpe yandi banzaka, “Wapi mfunu ya kumeka? Ba me basisa munu na nganda, kima mosi ve me bikana samu na munu.” Kasi yandi talaka, ya kutelama na lweka, to ya kuvwanda na lweka ya dibulu ya maza, mpe ya vwandaka na Muntu mosi ya kuvwanda kuna Yina tubaka na

yandi bima nyonso yina yandi salaka ntete, Nzambi ya kufuluka na kyadi ya Yandi.

¹⁴¹ Nzambi mosi yango, na nkokila yayi, kele kaka ya kufuluka na kyadi ya Yandi, mpe kaka mutindu Yandi vwandaka na bilumbu ya bawu. Nzambi ya kufuluka. [Kisika ya mpamba na bande—Mu.]

¹⁴² Mu banza ti beto kele na bakalati ya bisambu nkama zole awa, to yina beto me bokila na bankama zole. Beto ke bokila bawu mpe ke bika bantu na ndonga. Beto ke sambila samu na bawu.

¹⁴³ Kasi ntete beto sala yawu, ti ya kele na mwa bantu yina me kwiza awa mbala ya ntete, samu na kukatula balukwikilu nyonso ya luvunu. Yayi kele ve lukwikilu ya mabanza. Ya kele kumonisama ya nsilulu ya Nzambi. Ya ke tala na yina beno ke na kutala. Ngolo mosi ve na muntu mosi. Ya kele na ngolo ve na muntu mosi. Kasi beto mutindu bakwikidi kele na kiyeka; ngolo ve, kasi yayi.

¹⁴⁴ Muntu mosi yufuluka munu, ntama mingi ve, yandi tubaka, “Mpangi Branham, nge ke kwikila ti nge kele na ngolo ya kusala yayi?”

¹⁴⁵ Mu tubaka, “Mu kele na ngolo ve, ata fioti ve, kasi mu kele na kiyeka.” Konso mukwikidi kele na yawu. Kana beno manga yawu, beno ke vwanda kisika beno kele. Kasi kana beno ke ndima yawu, ya ke sala mpe ya kulutula kitoko, samu ti Nzambi kele ya kufuluka na kyadi ya Yandi.

¹⁴⁶ Beno baka mwa pulusu mosi ya kutelama awa na bala-bala, bilele ya yandi ndambu ke diembela na ngaanda ya yandi, yandi kele kieleka fyoti mingi. Yimpu ya yandi ya kubasika tii na makutu. Mpe yandi ke basika kuna kisika matoma ke kuma na bala-bala yina, na bakilometele makumi tanu na ngunga mosi, bankama tatu ya ngolo ya bampunda vwandaka sala na kati ya yawu. Yandi kele ve na ngolo ya kutelemisa velo. Ya kieleka. Kasi beno bika kaka yandi kubula sifflet yina mpe kusimba diboko yina, mpe beno tala mbote ba-frein ke yimba. Yandi kele na ngolo ve, kasi yandi kele na kiyeka. Mbanza ya muvimba kele na manima ya yandi.

¹⁴⁷ Mpe ntangu bakala to kento, mu ke kipe ve wapi mutindu beno kele, beno me kuzwa lutumu ya Nzambi, na nzila ya nsilulu, samu ti Yandi kele na kufuluka na kyadi mpe silaka na kusala ya kulutula nene. “Kana beno tuba na mongo yayi, ‘katuka awa,’ mpe beno tula ntembe ve na kati ya ntima ya beno, kasi beno kwikila ti yina beno me tuba ke salama, beno lenda kuzwa yina beno me tuba.” Beno kele na ngolo ve, kasi beno kele na kiyeka.

¹⁴⁸ Beno bambuka moyo ntangu Yandi tubaka na munu kuna na manima, yandi tubaka, “Nge ke vwanda na kiyeka ya kumonisa binsweki ya bantima.” Samu Yandi. . . Beno ke bambuka moyo

na yawu, mingi na kati ya beno bantu ya Phoenix? Yandi silaka yawu. Yina Yandi silaka, Yandi salaka yawu.

¹⁴⁹ Ntangu yayi ya kele na bayankaka ya beno awa yina kele ve na bakalati ya bisambu, mpe kukondwa ntembe. Bantu yikwa kele bambevo mpe bayina kele ve na bakalati ya bisambu, beno telemisa maboko ya beno? Ya kieleka. Mbote mingi. Kana beno zola kuzaba, lutumu ve . . . ngolo ve, kasi lutumu ya Ndinga, “Bima yina Mu ke sala, beno mpe ke sala yawu.”

¹⁵⁰ Yesu silaka, na Luc 17:30, ti kaka na ntwala ya Nkwizulu ya Yandi, ya ke vwanda mutindu na ntangu ya Moise . . . to Noé, “Ntangu bawu vwanda kudya mpe vwanda kunwa, mpe vwanda pesa na makwela; mpe zabaka ve tii kilumbu yina Noé kotaka na nzaza.” Yandi tubaka ti ya ke vwanda na ntangu yina. Na yina Yandi tubaka diaka, “Mutindu ya vwandaka na bilumbu ya Lot,” mpe tubaka, “yayi ke salama na kilumbu yina ntangu Mwana ya muntu ke monisama, ntangu Mwana ya muntu me monisama na bilumbu ya nsuka.”

¹⁵¹ Ntangu yayi beno tala yinki Yandi, mutindu Mwana ya muntu monikisamaka Yandi mosi na muntu ya Wanzio yayi, yina vwandaka Mwana ya muntu. Ya kieleka. Abraham bokilaka Yandi, “Elohim.” Yandi vwandaka Mwana ya muntu, yina monisamaka Yandi mosi kaka ntete yinza ya Bantu ya makanda kuyokamaka na tiya. Wapi mutindu Yandi salaka yawu? Na mukwikidi. Na mukwikidi ya kati-kati, Yandi fidisaka milongi zole kuna samu na kulonga bawu. Kasi na mukwikidi ya kieleka, Yandi telemaka na mukongo ya Yandi na tenta, mpe Yandi tubaka, “Abraham.” Yandi vwandaka Abram kilumbu . . . mwa bilumbu fioti na ntwala, yina. Kasi ntangu yayi yandi kele Abraham. “Wapi kento ya nge, Sarah?”

¹⁵² Yandi tubaka, “Yandi kele na kati ya tenta, na manima ya Nge.”

¹⁵³ Yandi tubaka, “Mu ke zitisa nsilulu ya Munu na nge. Mu ke kwisa kutala nge.”

¹⁵⁴ Oh, Abraham vwandaka na bamvula nkama mosi, mpe Sara vwandaka na makumi yivwa; kasi Nzambi, ya kufuluka na kyadi, zitisaka nsilulu ya Yandi. Yandi nataka bébé, samu ti Nzambi kele na kyadi, mpe Yandi vwandaka ya kufuluka na kyadi. Yandi kele na bimvwama na kyadi. Yandi ke zitisaka nsilulu ya Yandi.

¹⁵⁵ Beno tala, na mukongo ya Yandi ya kubaluka na tenta, Sara sekaka mpe tubaka, “Wapi mutindu bima yayi lendaka salama? Mu me nuna. Wapi mutindu mu ke sepela na bakala ya munu, mutindu ntwenya ya kento ya kukwela? Na yina, yandi kele na bamvula nkama mosi. Kimpangi ya beto me suka, bamvula mingi, mingi me luta. Wapi mutindu yayi lendaka vwanda?” Mpe yandi sekaka yawu.

156 Mpe Wanzio na . . . Mwana ya muntu na mukongo ya Yandi ya kubaluka na—na tenta, tubaka, “Samu na yinki Sara me seka, me tuba, ‘Wapi mutindu bima yayi lenda vwanda?’”

157 Yinki ya vwandaka? Yesu tubaka, na Santu Luc 17:30, ti, “Na bilumbu mutindu ya vwandaka na bilumbu ya Lot,” kisika mosi, na ntwala yinza ya Bantu ya makanda kuzika na tiya, Yandi tubaka, “Mwana ya muntu ke monisama Yandi mosi na kilumbu yina.” Yandi salaka nsilulu, ti Malachie 4 silaka beto ti ya ke tuba. Nsangu mosi ke salama yina ke vutula bantu na Nsangu ya kieleka ya pentecote, mpe na balusakumunu mosi yina bawu kuzwaka na kilumbu ya . . . Yinki ya kele? Ya kele ngononi ya luzolo zole, ya Malu-malu mpe ya Ngwisani ya Ntama, ke vukisa bansilulu ya yawu kintwadi, ya Nzambi, samu na kulungisa yina bansilulu ya Biblia me tuba ti ya ke sala. Amen.

158 Nzambi, ya kufuluka na kyadi, ke bika ve bantu ya Yandi kubasika na denomination yayi, “ya bimvwama mpe bima ya yinza,” Nsungi ya Dibuundu ya Laodicée, kasi Yandi ke sala nzila ya kukimina. Beno kwikila yawu, bantu. Nzambi sakumuna beno. Amen. Nzambi ya kufuluka na kyadi! Kyadi ya Nzambi, ya kele kaka kima yina mu zola. Ve ludedomo ya Yandi, ve musiku ya Yandi; kasi kyadi ya Yandi kele yina mu ke bokila. Nzambi tala munu kyadi. Beto nyonso kele na kuwa yango.

159 Mu vwandaka tala mbote. Ya kele na mwa kento mosi ya kuvwanda awa na nsuka ya kiti. Nge ke na kalati ya bisambu kuna, mama? Nge ke na yawu ve. Bika mu talisa na nge ti Nzambi kele ya kufuluka ya kyadi. Nge vwandaka kieleka ya kudasuka awa na nsukinina, mutindu yina ve? Ya vwandaka yimbi mingi, mpe meso ya nge me kuma yimbi mingi. Ya kieleka ve? Ya kele kieleka. Ntangu yayi ba ke soba. Nzambi, ya kufuluka na kyadi ya Yandi, na kulombaka beno kana beno ke kwikila yayi. Ntangu yayi beno kele ve na kalati ya bisambu, beno kele na kima mosi ve; kasi beno kele na nsatu ya yawu ve. Beno me mona, ya kele lemvo yina me beba mingi na beno.

160 Ya kele na mwa muntu mosi ya kuvwanda kaka kuna na ntwala, na mutindu ya . . . yina kele ya kuvwanda kaka awa na ngaanda. Yandi kele na kimbevo ya kuvimba na nzutu ya yandi. Ya me kwiza kaka ntama mingi ve kuna, ntama mingi ve. Ya kele kieleka ve, tata? Ya kele kieleka. Beno zaba ve yinki ya kele. Beno ke vwanda na boma ya yawu. Ya kele kieleka. Ba zengaka Yandi na mpasi, mutindu yina ve? Nge ke na kalati ya bisambu? Nge ke na kalati ya bisambu ve. Nge ke na nsatu ya mosi ve. Nzambi ya kufuluka na kyadi na Yandi!

161 Oh, mpangi-bakala, mpangi-kento, kwikila na Nzambi! Kutula ntembe na Yandi ve. Kwikila na Yandi! Ya kieleka.

162 Awa kele ya kuvwanda bakala mosi, yina me lwata kazaka ya mpembe, yina me lwata maneti. Beno tala awa, tata. Beno ke kwikila? Nzambi kele ya kufuluka na kyadi ya Yandi. Nge kele

ya kuvwanda kuna na hernie. Nge ke kwikila ti Nzambi lenda belusa hernie yina mpe kubelusa nge? Mu vwandaka kaka awa na nsuka ya kiti, vwandaka tala munu. Kana beno ke kwikila ti Nzambi lenda belusa kimbevo ya yandi yina, Nzambi ke sala yawu na beno kana beno ke ndima yawu. Nge ke kwikila yawu? Nge ke ndima yawu? Mbote mingi. Nge lenda kuzwa yawu kana nge ke kwikila kaka yawu, kuzwa kyadi. Yinga, tata.

¹⁶³ ya kele na mama mosi ya kuvwanda awa, yandi kele na mpasi na kutambula ya menga na nzutu ya yandi. Kasi kana yandi ke kwikila, Nzambi ke belusa yandi, kana yandi ke kwikila yawu. Mu ke kwikila ti yandi ke kondwa yawu, ya kieleka na nionso. Vwanda na kyadi, ya kele kisambu ya munu. Mu lendaka na mpasi kumona kento yango. . . Mama Riley, nge ke kwikila ti Nzambi lenda belusa bansaka yina ya mawa? Kana nge zola, kuzwa yawu! Amen. Beno kwikila kaka. Nzambi kele mbote, Yandi kele ve, Stella? Yinga. Ya kele kieleka. Mu me monaka ntete ve kento yayi na luzingu ya munu. Kasi, Nzambi, na kyadi ya Yandi!

¹⁶⁴ Awa kele ya kuvwanda kento yankaka, ya kuvwanda kaka na manima kuna, kaka na manima, ke tala kaka munu. Yandi, diaka, yandi me kuzwa boma ya mambu ya mawa, mpe. Yandi vwandaka banza na yawu kaka na ntangu yina. Mu me monaka ntete ve kento yayi na luzingu ya munu. Na yina kento yankaka yayi vwandaka na kima mutindu mosi, beno tala munu. Beno ke kwikila ti mu kele profete ya Nzambi, to kisadi ya Yandi? Nge kele diaka na mpasi ya ntima. Kana ya kieleka, telemisa diboko ya nge. Nge ke na yawu ve ntangu yayi. Nzambi, ya kufuluka na kyadi ya Yandi, ke na kulakisa ti Yandi kele moyo awa na kati ya yinzo yayi ya nene na nkokila yayi. Nzambi ya kufuluka na kyadi ya Yandi! Amen.

¹⁶⁵ Ya lenda vwanda, na lutangu ya misumuki mpe bantu ya retrograde yina ke telama, mpe ke tuba, “Nzambi, ya kufuluka na kyadi ya Yandi, vwanda na kyadi ya munu”? Beno telama. Mu ke sambila samu na beno, kana beno ke kwikila ti Yandi zola. . . beno zola kyadi ntangu yayi. Nzambi sakumuna nge. Nzambi sakumuna nge. Nzambi sakumuna nge, nge. Retrograde, beno telema. Nzambi ya kufuluka na kyadi ya Yandi! Beno—beno. . .

¹⁶⁶ Ya kieleka beno me kondwa mingi ve, na mutindu yayi, ti beno lendaka ve kumona ti ya kele nsilulu ya kieleka ya ngunga yayi. Ya kieleka beno kele ve ya kufuluka na denomination, mpe bima yankaka, ti beno lenda mona ve ti yayi kele nsilulu ya ngunga, Nzambi ya kufuluka na kyadi.

¹⁶⁷ Nani beno vwandaka, yina telemaka, mu ke sambila kaka na mwa ntangu fioti. Mu zola ti beno sala nzila ya beno na dibuundu mosi ya mbote ya Nsangu ya mbote ya muvimba mpe—mpe kuvwanda—mpe kuvwanda ya kubotama na mbotika ya Miklisto, Nzambi kupesa beno Mpeve-Santu.

168 Ya kele na yankaka yina ke telama, mpe ke tuba, “Munu, mu zola ti ba bambuka munu moyo. Nzambi, na kyadi ya Nge, bambuka moyo na munu. Mu me zinga ve mutindu mu zolaka sala. Mu banza. . .”? Nzambi sakumuna nge, mama. Mpe Nzambi sakumuna nge. Nzambi sakumuna nge. Nzambi sakumuna nge. Nzambi sakumuna nge. Ya kieleka. “Nzambi, ya kufuluka na kyadi ya Yandi, vwanda na kyadi ya munu.” Nzambi sakumuna nge, mpangi ya kento. Ya kele. . .

169 Bantu yikwa diaka kele awa, beno tuba, “Mu ke telama. Mu zola ti Nzambi kuzaba ti mu zola kyadi. Mu me zinga mbote ve. Mu me zinga mutindu *yayi* mpe mutindu *yina*. Mu me telema mpe mu ke zola mawa ya Yandi.” Nzambi sakumuna nge, mpangi ya bakala. Muntu yankaka, tuba, “Nzambi ya kufuluka na kyadi ya Yandi!” Nzambi sakumuna nge, mpangi ya kento. Nzambi sakumuna nge, mpangi ya kento. Ya kele kieleka. Nzambi ya kufuluka na kyadi ya Yandi! Nzambi sakumuna nge, mpe. Nzambi sakumuna nge kuna na manima. Nzambi me mona beno. Beno telama kaka.

170 Beno ke tuba, “Ya ke sala mbote, Mpangi Branham?” Ya kieleka. Beno telama mpe beno mona wapi mutindu ya ke sala luswaswanu.

171 Kana beno kele kieleka ya kusungama na ntima ya beno, Nzambi kele ya kufuluka na kyadi. “Yandi zola ve ti muntu kufwa, kasi ti muntu nyonso lendaka kwiza na kubalula ntima.” Nzambi ya kufuluka na kyadi ya Yandi! O Nzambi, vwanda na kyadi ya beto.

172 Ntangu yayi bantu yikwa na kati awa ntangu yayi, bayina kele na bakalati yango ya bisambu? Yinki bawu vwandaka? A mpe B, mutindu yina ve? A na B. Bantu nionso yina kele na bakalati ya bisambu A, beno telema na lweka *yayi*, mpe kalati ya bisambu B telema na manima ya bawu.

173 Mu ke kukiyufula kana ya kele na balongi awa yina ke zola kusadisa munu. Kana bawu kele, ke zola kwisa, mu ke vwanda na kiese na kuzwa lusalusu ya beno—ya beno awa, samu ti beto ke sepela na kusambila, mpe kusambila—kusambila na beno.

174 Yayi, Biblia ke tuba, “Bidimbu yayi ke landa bayina ke kwikila.” Yinga, tata. “Na Nkumbu ya Munu ba ke basisa bampeve ya yimbi, ba ke tuba bandinga ya malu-malu.” Beto me sala yawu? Na lemvo ya Nzambi; ve beto, kasi Nzambi ya kufuluka na kyadi samu na kuzitisa Ndinga ya Yandi. Nzambi!

175 Ntangu yayi, bakiti ya bambevo, kana beno zola kusonika yawu kaka awa na ntwala; beto ke sambila samu na bawu kaka awa, beto lenda benda bawu ve na lweka yina, na kulwale nyonso yina kuna. Ti, mbote mingi, ti bawu kwiza kaka awa. Kieleka beto ke sambila samu na bawu, mosi na mosi ya beto. Nzambi ya kufuluka na kyadi ya Yandi!

¹⁷⁶ Beno lenda telama na lweka ya diboko ya kibakala ntangu yayi, na mwa ntangu fyoti? Mpangi Brown kwisaka na nge? [Mpangi-bakala mosi me tuba, “Yandi ke kwisa mbasi.”—Mu.] Ke kwisa mbasi. Mu—mu—mu vwandaka na kivuvu ti yandi ke vwanda awa. Na yina, wapi kisika kele Mpangi Outlaw, wapi kisika kele Mpangi Fuller? Bantu yankaka yina vwandaka awa na munu ntangu mu kwisaka ntete, beto vutuka. Beno ke bambuka moyo na bandonga ya bisambu ya mutindu ya ntama, ntangu beto vwandaka telama kuna tii beno zolaka simba munu na lweka mosi, mpe muntu mosi na lweka yankaka, mu vwandaka lemba mingi?

¹⁷⁷ Bantu yikwa me vwandaka ntete na balukutakanu yina kuna na mbatukulu? Beno tala awa. Nge ke bambuka moyo na manima kuna, mu tubaka na nge ti Mfumu Yesu tubaka na munu yawu, kana mu ke vwanda ya kusungama, ti bima yayi ke salama. Ya kieleka? Beto me kuzwaka ata fioti ve kima ya mutindu yina na kilumbu yina. Kasi ya salamaka, samu Nzambi kele na kifuluka na kyadi ya Yandi, mpe ya kukwikama na nsilulu ya Yandi. Amen! Beno meka na kubika, mpe mu lenda ve. Amen! Lukumu na Nzambi! Alleluia! “Oh, mu kele na kyese mingi ti mu kele mosi ya bawu!” Amen. Oh, la la!

Ya kele pene na bisika nyonso bantu,
 Bayina bantima kele nyonso na tiya
 Na Tiya yina kubwaka na Pantekote,
 Yina sukulaka mpe vedisaka bawu;
 Oh, ya ke na kupela ntangu yayi na kati ya
 ntima ya munu,
 Oh, nkembo na Nkumbu ya Yandi!
 Mu kele na kyese mingi ti mu lenda tuba ti mu
 kele mosi ya bawu.

¹⁷⁸ Oh, munu, muntu ya kiadi, ya mpasi, muntu ya kufwa meso ya mawa, mutindu mu vwandaka; mpe ntangu yayi na kyadi ya Yandi, ya kifuluka na kyadi ya Yandi, mu lenda mona Kimfumu ya Nzambi na meso. Amen. Wapi mutindu Misiku ya Yandi kele kitoko!

¹⁷⁹ Telema, mpangi ya munu ya bakala, na mpasi ya nge. Kana beno lenda telama ve, mbote mingi, beno telama kaka awa, beto ke kulumuka kaka mpe ke sambila samu na beno.

¹⁸⁰ Mpe ntangu yayi ti A mpe B, bakalati ya bisambu, beno vwanda na lweka yankaka kuna, mpe beto ke sambila samu na bawu.

¹⁸¹ Bampangi ya balongi, ya kieleka, kana beno ke kwikila na kutentika maboko na zulu ya bambevo, beno kwisa awa mpe beno telama na munu na estrade yayi. Beto ke sambila samu na bambevo.

¹⁸² Ntangu yayi samu na beno bantu yina kele ya kutelama na ndonga yina, kana beno lenda kwikila ti Mvwandulu ya Nzambi

kele awa, ti Mpeve-Santu kele na kati ya beto ntangu yayi, ke na kusala kaka kieleka yina Yandi tubaka ti Yandi ke sala. Kana mu vwandaka na ngolo ya kubelusa beno, kieleka mu zolaka sala yawu. Kana mu vwandaka na mutindu mosi ya kubelusa beno, kieleka mu zolaka sala yawu. Mu kele na yawu ve. Mu . . . Nzambi me pesa mwa dikabu.

¹⁸³ Mu kele mingi ya mulongi ve. Mu me longukaka mingi ve samu na kuvwanda ya kulunga mutindu longi, yina ba me bokila longi na bilumbu yayi, ntangu—ntangu banzingulu fwana vwanda zingulu ya théologie, mpe ya fwana vwanda na diplome ya doctorat, mpe nionso yina. Mu lenda ve kuvwanda ya kulunga samu na yawu. Kasi Nzambi, na kumonaka ntima ya munu, mpe zaba ti mu zola kusala kima samu na Yandi, mu zola kusepela na yawu.

¹⁸⁴ Muntu mosi tubaka na munu kilumbu yina, yandi tubaka, “Mu banza ti nge kele kaka muntu ya mbote, Tata Branham, kasi mu ke kwikila ti nge kele kieleka na foti. Beno nionso kele na ngaanda ya luzolo. Beno zaba ti beno ke kuzwa kubedisa na nsuka?”

¹⁸⁵ Mpe mu tubaka, “Tala, mu zola tuba na nge kima mosi. Mu ke tuba ti beno—ti beno ke vwanda ya kusungama, samu na kutuba kaka samu na dyambu ya kuswana yayi. Kana mu kele na foti, na yina mu—mu ke kwikila ve ti mu kele; kasi kana mu vwandaka na kifu, mpe mu zabaka mbote ntangu yayi ti mu ke zinga bamvula nkama mosi, mpe Yandi zolaka kufundisa munu na nsuka ya nzila, mpe tuba na munu, ‘Nge fwana kwiza ve na Mazulu ya Munu, William Branham. Basika na kati ya mpimpa.’ Beno zaba yinki? Mu ke sadila Yandi konso kilumbu ya luzingu ya munu tii kuna mu ke kwenda, na mutindu nionso. Samu ti mu me kuzwa balusakumunu mingi ya Yandi ya kati-kati, ti Yandi kele ya kulutila luzingu samu na munu. Yandi kele nyonso yina mu . . .”

¹⁸⁶ Nionso yina mu kele, nionso yina mu lendaka vwanda na kivuvu na kuvwanda, mu me kuzwa ndandu ya lemvo mpe kyadi ya Yandi. Mu vwandaka muntu ya mawa, ya mawa, ya mpasi, ya mpofi; kasi na lemvo Yandi me belusa munu, mpe mu kele na ngolo mpe kele na mavimpi ya mbote, na lemvo ya Nzambi. Mu kele na meso ya mbote. Mu ke kudiaka, mu ke nwaka, mu ke na nionso yina mu ke na yawu nsatu. Yandi silaka ata fioti ve na kupesa bansatu ya munu; nsatu ya munu.

¹⁸⁷ Mpe kana mu me kwenda kilumbu yina, mpe mu me zaba . . . Mu lenda mona ve kisika mu ke vwanda. Kasi kana mu zabaka ti mu vwandaka na kifu, mpe Nzambi soolaka munu na kuvwanda na kifu, Mu ke zola kuvwanda na foti, mpe samu ti mu zola kusala luzolo ya Yandi. Ya kele, mu zola Yandi tii mu zola luzolo ya Yandi kusalama. Ntangu yayi, ya kele nsamunu ya nene, kasi mu banza ti beno ke kuzwa yawu na mutindu, mpeve mu

tubaka yawu. Beno me mona, mu zola kusala luzolo ya Yandi. Mu ke lomba Yandi kima mosi na ntangu mosi, Yandi ke ningisa yintu ya Yandi “ve,” mu ke sepelaka mingi na yawu mutindu mu lendaka sala yawu kana Yandi me tuba “yinga.” Samu, beto ke zolaka ntangu nionso kulomba, “Luzolo ya nge kusalama.” Kukondwa ya yandi kele kaka mutindu . . . kana ya kele luzolo ya Yandi, ya kele kaka . . . Ya kele mbote mingi kulutila ba-Yinga ya Yandi, kana ya kele luzolo ya Yandi na kusala yawu. Ya kele ntangu beno ke zolaka Yandi ya kieleka. Amen.

¹⁸⁸ Mu ke kota na kuzonza na zulu ya Yandi, mu lenda telema ve. Oh, Yandi kele kieleka, kieleka mingi samu na munu! Bankundi, Yandi kele—Yandi kele nyonso yina mu kele, nyonso yina mu lendaka vwanda, nyonso yina mu ke vingila na kuvwanda, kele ya kufuka na kati ya Klisto Yesu, Ndinga ya Yandi.

¹⁸⁹ Mu ke vutula matondo na nkokila yayi samu na mbangi ya Mpeve-Santu, samu na Nsangu. Mu zaba ti ya lendaka vwanda, bayankaka lendaka wisana na Yawu ve, kasi mutindu mu me tuba na beno, mu kele ya kukangama na Nsangu. Kidimbu mosi basikaka, mpe Nzambi ke fidisa ve kidimbu samu na kutalisa ti Yandi kele Nzambi. Nsangu mosi, Ndinga ke landaka ntangu nionso kidimbu. Muntu nionso kuzaba yawu.

¹⁹⁰ Yesu kwizaka na bidimbu mpe mambu ya ngitukulu. Yandi vwandaka Muntu ya nene ntangu Yandi vwandaka sala bidimbu mpe mambu ya ngitukulu, kasi ntangu Yandi bandaka na kuvwanda mpe bandaka na kulonga Nsangu, “Munu na Tata ya Munu kele Mosi,” oh, la la, yina vwandaka tambula mbote ve na bawu. Beno me mona? Kasi Ndinga zolaka landa kidimbu.

¹⁹¹ Moise bakaka bidimbu zole, mpe konso kidimbu vwandaka na ndinga mosi. Ya kieleka. Mu longaka yawu awa mwa ntangu fioti me luta, kisika mosi kuna, na, *Ndinga Ya Kidimbu*. Yawu lunga vwanda kaka na Ndinga ya kidimbu. Yawu ke nsobolo mosi. Konso ntangu yawu ke mutindu yina. Kana yawu ke mutindu yina ve, yawu me katuka na Nzambi ve.

¹⁹² Kana muntu basika na ministere ya ngitukulu, yina me monana na kati ya Biblia samu na kuvwanda Kieleka, mpe muntu yango ke vwanda kaka na malongi mosi yango ya ntama ya ba-denomination, ke zimbana yawu. Kima ve na yawu! Nzambi ke salaka kima mutindu yina. Kima yina, yina kele mani ya kubola yina kele na bambuma na kati ya yawu, to mafundi, to nyonso yina beno zola kubokila yawu, kubanda bamvula makumi yiya, makumi tanu me luta, ba vwandaka meka kaka na kudia mana yina ya ntama yina kubwaka ntama. Mpe bana ya Israel, na nzietolo ya bawu, mana ya malu-malu kubwaka konso nkokila. Ya kieleka, beno lendaka ve kubumba yawu.

¹⁹³ Beto ke zingaka ve na nsungi yankaka yina lutaka. Beto ke na kudia Mana ya malu-malu, Mana ya malu-malu yina me

katuka na Zulu, na nzietelo ya beto na ntangu beto ke kwenda na ntuala.

Beto kulumusa bayintu ya beto ntangu yayi.

¹⁹⁴ Mfumu Nzambi, Nge kele ya kieleka, Mvwandulu ya Nge. Mu ke banza na lemvo, Mfumu. Beto—beto me mona kaka ti Nge ke sala bima mingi! Beto me kuwa Nge kuzonza na bandinga, kumona Nge kutendula yawu, na nzila ya bantu ya Nge. O Nzambi, na kumona Nge kubelusa bambevo, kuzibula meso ya bampofo, ke sala bantu ya makulu ya kufwa kutambula, bantu ya makutu ya kufwa samu na kuwa, dibaba kutuba, yinki Nzambi ya nene mpe ya ngolo Nge kele!

¹⁹⁵ Mpe na manima kumona ti Nge silaka yayi na bilumbu ya nsuka. Ata ti beto kele na bakumekula mingi ya nsuni, kasi ya ke tuba kaka ti ya kele na Nzambi ya kieleka, kisika mosi kuna, ya kieleka yina kele ya kieleka. Mpe mu ke sambila, Tata ya Mazulu, na nkokila yayi, ti beto ke kuma na luzabu ya Nzambi ti beto ke mona ti Nge kele awa.

¹⁹⁶ Mpe bantu yayi na ndonga, ntangu bawu ke luta na ndonga yayi, Mfumu. . . samu ti beto ke na kusalaka yayi samu ti, ti beto salaka nsilulu na bawu. Mpe Nge tubaka, “Bidimbu yayi ke landa bayina ke kwikila.”

¹⁹⁷ Awa kele bampangi ya balongi ya kutelama awa, bantu yina Nge soolaka, ntete mbandukulu ya yinza, kuvwanda yina bawu kele na nkokila yayi. Beno zaba, ntete ya vwanda na yinza, ti beto ke telama awa na nkokila yayi, samu ti Nge kele ya kukondwa nsuka.

¹⁹⁸ Na yawu beto ke sambila, Tata ya Mazulu, na nkokila yayi, ti mutindu bantu ya kubela yayi, kikata, bampofo, bantu ya makulu ya kufwa, bantu ya kubela na cancer, nyonso yina ya lendaka vwanda, yina lutaka na ndonga yayi, ti bawu zaba ti Nzambi ya kieleka yina zaba kinsweki ya ntima ke belusa bawu, kana bawu ke ndima yawu kaka, beno tala kaka mpe beno bakula.

¹⁹⁹ Muntu yina talaka na nyoka ya kisengo kaka mutindu nganga-Nzambi. . . na kitini ya kisengo, yandi zolaka beluka ata mbala mosi ve, samu yandi vwandaka bakula ve yina yawu vwandaka.

²⁰⁰ Mpe bubu yayi, Mfumu, mutindu mosi. Kana bawu tala na zulu ya dikabu mosi, samu na kubanza ti ya lendaka vwanda na kiyeka ya kusadisa bawu, bawu me kuzwa ve lubakusu. Ya kele na nsiamisa ya Mvwandulu ya Nzambi yina kele awa samu na kubelusa. Pesa yawu, Tata. Bika yawu salama, na Nkumbu ya Yesu. Amen.

²⁰¹ Mu zola mwa pianiste, kana yandi zola, bakala to kento, muntu nyonso yina ya lendaka vwanda, samu na kukwenda kuna mpe kubula nkunga yayi, “Munganga ya nene kele awa ntangu

yayi, Yesu yina ke kabulaka kyadi,” kana yandi zola, kisika nyonso pianiste kele. Ntangu yayi ya kele. . .

²⁰² Mu ke bambuka moyo mosi ya lukutakanu ya munu ya ntete ya kubeluka ya nzutu, na Fort Wayne, na Indiana. Mwa-mwana mosi ya kento Amish kele ya kuvwanda, ke na kubula piano yina, “Munganga ya nene kele awa, yina ke kabulaka kyadi Yesu.” Ba me nata bébé mosi na munu na estrade, ya vwandaka kikata. Mpe na yina mu vwandaka sambila samu na bébé yina, yandi tandaka diboko ya munu mpe yandi kimaka mbangu na estrade. Mama kangamaka. Nkooko ya kento me telemisa muswale ya yandi, yandi bandaka na kudila.

²⁰³ Mpe mwa mwana ya kento ya Bunzambi yayi ntangu yayi, na kuzabaka kima ve na zulu ya Pantekote, samu ti yandi vwandaka ya dibuundu ya Klisto; kasi yandi vwandaka bula. Nsuki ya yandi ya yinda kubwaka; yandi kutelamaka na Kimpeve mpe bandaka na kuyimba na bandinga ya kuzabana ve, mpe. . . mpe na ngwisani ya nkunga yina. Mpe banoti ya piano yina me mata mpe me kulumuka, ke na kubula, “Dokotolo ya nene ntangu yayi kele pene-pene, Muntu ya kyadi Yesu.” Amen! Yandi kele mutindu mosi mazono, bubu yayi, mpe kukonda nsuka.

²⁰⁴ Ntangu yayi beto sambila ntangu yayi na yina. . . Ntangu yayi ti beto muntu nyonso kuna kusambila. Beno bantu ke luta na ndonga, ntangu beto ke tetika maboko na zulu ya beno, beno bambuka moyo, Yesu tubaka, “Kana beno ke kwikila yawu, beno ke beluka.” Beno ke kwikila yawu? Ntangu yayi beto nionso yimbila ntangu yayi.

Munganga ya nene kele awa ntangu yayi,
Yesu yina ke kabulaka kyadi;
Yandi ke zonga. . .

Beto kanga kaka meso ya beto ntangu yayi na yina beto ke yimba.

. . . bantima ya kulemba,
Oh, beno kuwa Ndinga ya Yesu.
Noti ya kulutila lembami ya nkunga ya selafa,
Nkumbu ya kitoko na zulu ya yinwa ya yina ke
kufwa,
Ya kulutila mbote. . . (Tata Nzambi, kwisa na
zulu ya bantu ntangu yayi). . . yimbaka ve,
O Yesu, Yesu ya kusakumuna.
Ya nene. . .

²⁰⁵ Ntangu yayi na yina beno ke na kuluta ntangu yayi, Yandi kele awa. Beno baka ndinga ya munu, to beno kwikila yawu beno mosi, Yandi kele awa. Muntu nionso kusambila kuna na ntangu yayi samu na bantu. [Mpangi Branham ke sambila samu na bambevo, Mpangi Borders ke na kuyimbaka *Munganga ya Nene*. Kisika ya mpamba na bande—Mu.]

O Mfumu, mu ke kwikila, O Mfumu, mu ke kwikila;
Nionso ke salama, O Mfumu, mu ke kwikila.

²⁰⁶ Bayina nionso ke kwikila, beno telemisa diboko ya beno mutindu yayi, beno tuba, “Mu ke kwikila.” [Dibuundu me tuba, “Mu ke kwikila.”—Mu.]

²⁰⁷ Awa kele ya kuvwanda na muntu ya kuvwanda awa. Ya kele samu na yina mu vwandaka me kufwa; na kuzonza, yandi ke na kufwa na cancer. Yandi kele na mpasi ya nene yayi. Ya kele ve na mutindu na yinza samu na muntu na kuzinga, na ngaanda ya Nzambi. Yandi kele na cancer na nzila ya misopo, mpe yandi ke kufwa kana ya kele ve samu na kyadi ya Nzambi. Mpe mu ke zola ti mu lendaka kaka . . . [Kisika ya mpamba na bande—Mu.] . . . ndinga ya kikesa na muntu yayi.

²⁰⁸ Beno, beno zaba ti badokotolo lenda sala kima ve samu na beno ntangu yayi. Beno kele ntama na yawu, beno me mona. Mpe beno kele . . . Beno kele kaka na siansi mosi, mpe ya kele na kati ya Klisto, beno me mona. Mpe, mpangi, beno . . . Mu ke kufwa kilumbu mosi, mpe. Beno ke kwenda, kana Yesu vutuka nswalu ve. Mu fwana kukutana na beno kuna, kutelama kuna na Kiti ya Lufundusu. Mpe na nkokila yayi . . .

²⁰⁹ Beno zaba, mutindu na televizyo, televizyo me baka yawu ntangu nionso beto ke katula musapi ya beto, konso kima yina, ya kele na bande. Konso ndinga beto ke tuba, kele na bande. Ntangu yayi, beno me mona, televizyo me lakisa yawu. Ntangu yayi, televizyo ke salaka foto ve, ya ke twadisa kaka yawu na televizyo. Beno me mona, ya ke salaka yawu ve. Ya vwandaka na televizyo ntangu Adam lutaka na zulu ya ntoto, ya vwandaka na televizyo ntangu—ntangu Moïse kwizaka na Mubu ya Mbwaki, ya vwandaka na televizyo ntangu Elie vwandaka na zulu ya Mongo Carmel, beno me mona, kasi bawu kaka ntangu yayi bakulaka yawu. Beno me mona? Mpe ntangu yayi bisika nyonso mu . . .

²¹⁰ Kuningana nionso beto ke sala, mpe konso muningu yina, ya ke bula bande yina ke kutana na beto na Lusambusu. Kuningana nionso beto ke sala fwana kukutana na beto kuna. Mu fwana pesa mvutu samu na bandinga yina mu ke tuba na beno, mutindu longi. Mu fwana sala yawu, samu ti Nzambi ke tula kizitu ya munu na yawu.

²¹¹ Ntangu yayi kana mu lendaka, mu ke belula beno; samu beno kele kaka na mwa ntangu fioti, kana ya kele ve samu na Nzambi. Ntangu yayi, mu me kulumuka mpe me sambila samu na beno, nyonso mu zaba mutindu ya kusala. Mpangi, mu lenda sala nionso na yinza, mu lenda sala samu na muntu yina me vwanda kuna na mutindu yina, mu ke sala yawu.

²¹² Mpe bika mu yufula beno, beno me mona. Beno—beno—beno me beluka yimeni, samu ti Yesu tubaka ti beno vwandaka. Beno

me mona, “Na bamputa ya Yandi beto me beluka.” Ntangu yayi kana beno lenda, na yisi ya ntima ya beno, kundima yawu, beno ke kufwa ve ntangu yayi, kasi beno ke zinga.

²¹³ Ntangu yayi, beno me mona, ntangu yayi beto zaba ti televizyo ke luta na kivinga yayi. Beto zaba yawu. Beto ke mona yawu ve. Beto lenda mona yawu ve, meso ya beto me salama ve, ba-sense ya beto lenda ve kubaka yawu. Ba fwana sala tibe mosi, to nionso yina ya kele, ya galène, samu na kukanga yawu.

²¹⁴ Mutindu mosi Nzambi kele awa. Beto ke mona Yandi ve, kasi beto zaba ti Yandi kele awa. Yesu Klisto kele mutindu mosi. Beno tala, Yandi tubaka kaka Yandi mosi, mutindu Yandi salaka Yandi mosi. Ntangu yayi, na yina me tala kubeluka ya nzutu, kana Yandi vwanaka ya kutelama kaka awa ntangu yayi, Yandi zolaka sala dyaka ve samu na beno, beno me mona, kima yankaka ve. Kana Mwana ya Nzambi vwanaka kaka ya kutelama awa, yina Yandi kele, Yandi kele awa, kasi Yandi lendaka diaka ve kusala samu na beno, samu Yandi me kukitalisa Yandi mosi awa. Beno me mona? Mpe Yandi kele awa na ntangu yayi, kaka mutindu mosi, samu na kubelusa beno mpe kusala beno mavimpi ya mbote.

²¹⁵ Mpe mama yina ya leke tubaka na munu, yandi tubaka, “Nge pesaka lusakumunu, mpe pesaka profesi to kima mosi,” na zulu ya yandi, ti yandi zolaka kuzwa bébé, ya kuvwanda na fauteuil roulant yina. Mpe yandi salaka yawu, yandi vwanaka na bebe ya yandi.

²¹⁶ Mpe ntangu yayi mama yayi ya leke me vwanda awa. Ntangu yayi yandi vwanaka na lipaso yina me zabana mingi, mpe yawu simbaka yandi. Mbote, beto ke mona kaka bima mingi ya yawu kusalama. Ntangu yayi, mpangi-kento ya leke, mu zaba ti nge kele Muklisto ya kieleka. Samu na yinki Nzambi me bika beno vwanda kuna, mu zaba ve. Mu ke kwikila, ntangu yankaka, ya kele samu ti beno kele. . . Lukwikilu, beno—beno ke na kumeka na kuzwa lukwikilu, samu na kubasika kuna, beno me mona; kasi ntangu yayi beno tala, beto meka kaka ve na kuzwa yawu, beto kuzwa kaka yawu ntangu yayi, beno me mona, beto ke vwanda kaka—beto ke vwanda kaka kuna. Yawu yina kaka, ya ke banda kaka na ntangu yayi, mpe beto ke beluka. Mpe beno bantu yina kele kuna na bakiti yina, yinki, to—to nionso yina beno kele, beno bambuka kaka moyo ti Klisto kele awa.

²¹⁷ Ntangu yayi beno ke tuba, “Ya kele na muntu, beno ke mona foto ya munu ke na kuluta.” Oh, yinga.

²¹⁸ Mpe Bandinga ya Yesu Klisto, yina Yandi tubaka ntangu Yandi vwanaka awa na zulu ya ntoto, ke luta kaka na kati ya kivinga yayi. Ya ke kufwaka ata mbala mosi ve. Bantu yikwa zaba ti ya kele na mutindu ya science kieleka? Mbote, yinki ya kele? Na yina Mpeve ke baka Ndinga yina me sonama, mpe ke sala Yawu kotalana. Oh, nkembo!

²¹⁹ Yandi kele awa. Yandi kele kaka awa ntangu yayi, Mfumu. Beto kaka . . . Beto me mona mingi, Yandi me sala mingi, tii kuna beto ke vwanda kaka, beno zaba, ba ke kubwa na zulu ya yawu. Kana beto ke bakula, ya kele ve kaka mwa disolo, nzonzolo mosi ya théologie; kasi nzikisa ti Yandi silaka ti Yandi ke kukitalisa Yandi mosi na kilumbu yayi, awa Yandi ke na kutubaka kaka yawu awa na ntuala ya beto malu-malu yayi. Wapi mutindu ya kima ya mbote! Ya kele mbote ve?

²²⁰ Ntangu yayi beno ke kwikila. Beno ke kwikila yawu? Beno kwikila ti beno ke kufwa ve. Beno ke zinga, mpe beno ke pesa lukumu na Nzambi. Beno ke pesa lukumu na Nzambi. Beno me kuzwaka ntete mbotika? Beno kele Muklisto, beno kele? Mpe beno kele Muklisto. Mbote, nge zola kuzinga samu na lukumu ya Nzambi. Na yina kwenda zinga, mpangi ya munu ya bakala. Na Nkumbu ya Yesu Klisto, zinga!

²²¹ Mpe, mpangi ya kento, nge zola tambula samu na nkembo ya Nzambi, mpe kukipe bebe ya nge; na yina tambula, mpangi ya kento, na Nkumbu ya Yesu Klisto!

²²² Beno, beno nionso, beno sala mutindu mosi, na Nkumbu ya Yesu Klisto! Beno zimbana ve Motel yayi Ho ya Wesete awa na nkokila yayi, Mvwandulu ya Nzambi me talisama awa. Yandi kele ve muntu yina ke yambaka ve. Yandi zola kaka ti beno kwikila. Beno ke kwikila Yandi ntangu yayi? Amen. Nzambi sakumuna beno.

²²³ Beto kulumusa bayintu ya beto ntangu yayi. Mu zaba ve nani ba me soolaka, samu—samu na kusukisa. Mpangi Mushegian awa, kwisa awa, mpangi-bakala. Yandi ke sukisa na kusambila. Nzambi sakumuna nge.



NZAMBI YINA KELE YA KUFULUKA NA KYADI KNG65-0119
(The God Who Is Rich In Mercy)

Nsangu yayi ya Mpangi William Marrion Branham, kulongamaka na Kingelesi, na Kilumbu ya zole na nkokila, na kilumbu ya 19 ya Ngonda ya ntete, na mvula 1965, samu na Full Gospel Business Men's Fellowship International na Westward Ho Hotel na Phoenix, Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org